

MESYUARAT PERTAMA, PENGGAL KEEMPAT
PARLIMEN KEEMPAT BELAS
2021

HARI RABU : 6 OKTOBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 13 HINGGA NO. 55)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB TUAN KHALID BIN ABD SAMAD
[SHAH ALAM]
TARIKH : 6 OKTOBER 2021 (RABU)

SOALAN

Minta **MENTERI SAINS, TEKNOLOGI DAN INOVASI** menyatakan apakah status terkini program perbelanjaan bagi projek vaksinasi kebangsaan Kerajaan yang telah dijalankan dan jumlah penduduk Shah Alam yang telah menerima 2 dos lengkap vaksin dan bilakah jangkaan Parlimen Shah Alam boleh mencapai *herd immunity*.

JAWAPAN

Tuan Yang di-Pertua,

Untuk makluman Ahli Yang Berhormat,

Setakat 30 September 2021, daripada jumlah RM1 bilion tersebut, sebanyak RM352.63 juta telah dibelanjakan meliputi:

- (i) sewaan;
- (ii) utiliti perkakasan;
- (iii) peralatan pakai habis;
- (iv) pembersihan dan sanitasi;
- (v) perkhidmatan makan minum petugas;

- (vi) bayaran *token* bulanan sukarelawan dan keselamatan;
- (vii) integrasi data dan sistem; dan
- (viii) bayaran perkhidmatan jangkau luar komuniti dan perkhidmatan lain.

Perbelanjaan ini dikendalikan oleh CITF Persekutuan dan penyaluran telah dibuat kepada negeri-negeri dan Jabatan serta Agensi seperti Jabatan Belia dan Sukan, Jabatan Sukarelawan Malaysia (RELA) dan Angkatan Pertahanan Awam (APM).

Shah Alam berada di bawah daerah Petaling dan merupakan salah sebuah komponen di bawah Lembah Klang. Bagi daerah Petaling, setakat 4 Oktober 2021, seramai 1.46 juta atau 92.1% telah menerima dos lengkap daripada keseluruhan populasi dewasa seramai 1.58 juta orang. Berdasarkan statistik ini, daerah Petaling telah mencapai sasaran 80% populasi dewasa lengkap divaksin.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
(HULU RAJANG)**

TARIKH : 6 OKTOBER 2021 (RABU)

SOALAN

Minta **MENTERI PERTAHANAN** menyatakan status Jalan Jiwa Murni Nanga Merit - Belaga.

JAWAPAN

Tuan Yang di-Pertua,

Projek Jiwa Murni bagi pembinaan jalan dari Nanga Merit ke Belaga sepanjang 130 km yang melibatkan kos berjumlah RM316 juta telah mula dilaksanakan pada 4 Mei 2016 dan dijangka siap sepenuhnya pada hujung tahun 2021. Walau bagaimanapun, pandemik Covid-19 yang melanda negara pada tahun 2020 telah menyebabkan perlaksanaan aktiviti kerja di tapak tergendala. Kemajuan terkini adalah 82% dan projek dijangka akan dapat disiapkan sepenuhnya pada Oktober 2022.

Penularan wabak Covid-19 telah menjejaskan kelancaran pelaksanaan projek-projek ini. Namun demikian, pihak Angkatan Tentera Malaysia (ATM) dengan kerjasama dari agensi kerajaan yang lain akan terus komited untuk menyiapkan projek ini dalam tempoh yang telah ditetapkan demi kepentingan penduduk setempat.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB DR. ONG KIAN MING (BANGI)

TARIKH : 06 OKTOBER 2021 (RABU)

SOALAN

DR. ONG KIAN MING [BANGI] minta **MENTERI KERJA RAYA** menyatakan hasil siasatan yang dilakukan terhadap kemalangan di tapak pembinaan SUKE pada 22 Mac 2021, kemalangan di tapak pembinaan DASH pada 19 Jun 2021 dan kemalangan di pembinaan LRT3 tapak di Bandar Bukit Tinggi, Klang pada 30 Julai 2021 dan langkah-langkah yang diambil untuk memastikan kemalangan ini tidak berulang di tapak-tapak pembinaan ini.

JAWAPAN

Tuan Yang Di-Pertua,

Untuk makluman Ahli Yang Berhormat,

Kes 1

Kemalangan di tapak pembinaan Lebuhraya Bertingkat Sungai Besi - Ulu Kelang (SUKE) pada 22 Mac 2021, kes ini dalam siasatan Jabatan Keselamatan dan Kesihatan Pekerjaan (JKKP) kerana melibatkan insiden kerja kren serta melibatkan kematian tiga (3) orang pekerja binaan warga asing. Kementerian Kerja Raya (KKR) melalui agensinya Lembaga Pembangunan Industri Pembinaan Malaysia (CIDB) telah melaksanakan siasatan terhadap dua (2) syarikat yang terlibat dalam insiden berkenaan. Dua (2) syarikat berkenaan boleh dikenakan tindakan dibawah Seksyen 34B, Akta 520 kerana tidak menjalankan kewajipan kontraktor dan kegagalan memastikan keselamatan bangunan dan kerja pembinaan sama ada semasa atau selepas kerja pembinaan. Notis tutup tapak N3B/2015 telah dikeluarkan kepada kontraktor pada tarikh yang sama.

Kes ini akan dibawa ke prosiding tatatertib kerana ia melibatkan keselamatan orang awam pada 17 September 2021.

Kes 2

Kemalangan di tapak pembinaan Lebuhraya Bertingkat Damansara - Shah Alam (DASH) pada 19 Jun 2021, KKR melalui agensinya CIDB kini dalam proses penyiapan kertas siasatan (IP) pendakwaan dibawah Seksyen 34D (Kematian yang disebabkan oleh pelanggaran kewajipan oleh kontraktor), Akta Lembaga Pembangunan Industri Pembinaan Malaysia 1994 (Akta 520) terhadap syarikat Sub-kontraktor yang menjalankan kerja-kerja "Reinforced concrete and other associated works" kerana tidak menjalankan kewajipan kontraktor dibawah Seksyen 34B, Akta 520, dimana kegagalan memastikan keselamatan bangunan dan kerja pembinaan sama ada semasa atau selepas kerja pembinaan. Notis

arahan tutup tapak N3B/2015 telah diberikan kepada kontraktor pada 20 Jun 2021.

Kes 3

Kemalangan di pembinaan LRT3 tapak di Bandar Bukit Tinggi, Klang pada 30 Julai 2021, KKR melalui agensinya CIDB kini masih lagi menjalankan siasatan untuk mengenalpasti punca keruntuhan ‘false work Pier 22-41’ dan mengumpul pembuktian berkaitan insiden, berdasarkan peruntukan Akta Lembaga Pembangunan Industri Pembinaan Malaysia (Akta 520). Kemalangan ini akan diklasifikasikan dibawah Seksyen 34D, Akta 520 disebabkan terdapat satu (1) kematian pekerja binaan warganegara Bangladesh. Dua (2) notis pemberhentian kerja N2B/2015 telah dikeluarkan masing- masing kepada kontraktor utama dan subkontraktor terlibat. Kontraktor utama dan subkontraktor telah dipanggil untuk memberikan keterangan.

Untuk makluman Ahli Yang Berhormat, KKR amat prihatin terhadap isu-isu keselamatan dan kesihatan pekerjaan di tapak bina serta yang melibatkan keselamatan awam yang berada berhampiran tapak pembinaan. Kerja-kerja pembinaan yang berdekatan atau di atas jalan raya berisiko dan memerlukan langkah kawalan keselamatan yang ketat. Selain dari objek yang jatuh kerana aktiviti pembinaan, keselamatan pengguna jalan raya juga mungkin terganggu sekiranya tiada langkah dan prosedur keselamatan yang cukup dipatuhi selama fasa pembinaan dilaksanakan

Sehubungan itu, KKR melalui CIDB telah mewujudkan dan mempengerusikan satu jawatankuasa pembangunan standard iaitu CIS 28:2021 Public & Road User Safety – Construction Works Adjacent To And Above Roadways. Dokumen CIS 28:2021 Public & Road User Safety – Construction Works Adjacent to And Above Roadways kini telah siap dan diterbitkan untuk kegunaan ahli industri mahupun menjadi rujukan masyarakat awam.

Selain dari itu, sebagai langkah pencegahan insiden, Safety And Health Assessment System In Construction (SHASSIC) telah diperkenalkan sejak 2018 bagi membantu penggiat industri menambah baik amalan Keselamatan dan Kesihatan Pekerjaan (OSH) di tapak bina. Dengan pelaksanaan SHASSIC, prestasi OSH kontraktor dalam sesebuah projek ataupun aktiviti pembinaan dapat dinilai secara objektif.

Bagi membantu penggiat industri menambah baik amalan OSH, KKR melalui CIDB turut mengaturkan beberapa latihan khusus atau tindakan pembetulan untuk memperbaiki pengurusan keselamatan dan kesihatan di tapak bina.

Ini bagi mengurangkan kes-kes kemalangan dalam pembinaan dan meningkatkan kualiti serta kesejahteraan sumber manusia yang bekerja dalam industri ini.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
(PARIT)**

TARIKH : 6 OKTOBER 2021 (RABU)

SOALAN

Minta **MENTERI PERTAHANAN** menyatakan :-

- (a) apakah kaedah terbaik yang akan digunapakai oleh Kementerian bagi memastikan insiden pencerobohan ruang udara oleh tentera China tidak berulang;
- (b) adakah langkah jangka masa panjang yang akan dilaksanakan bagi memastikan keamanan serta kestabilan di Laut China Selatan.

JAWAPAN

Tuan Yang di-Pertua,

Mengenai pencerobohan pesawat udara Tentera Republik Rakyat China di kawasan Malaysia baru-baru ini dan kaedah terbaik yang digunakan untuk mengelakkan perkara ini tidak berulang, ingin dimaklumkan bahawa melalui Operasi Curiga, ruang udara nasional sentiasa dipantau oleh sistem radar pertahanan udara jarak jauh TUDM. Pada masa yang sama, TUDM turut meletakkan pesawat Hawk 208 daripada No. 6 Skuadron di Pangkalan Udara Labuan dalam keadaan siap sedia sepanjang masa.

Contoh terbaik pelaksanaan operasi curiga TUDM adalah semasa kejadian penerbangan mencurigakan oleh pesawat tentera udara Republik Rakyat China pada baru-baru ini. Melalui Operasi Curiga ini, pesawat Ilyushin Il-76 dan pesawat Xian Y-20 telah dikenalpasti melalui identifikasi visual oleh TUDM.

Insiden ini merupakan perkara yang serius terhadap ancaman kedaulatan negara dan keselamatan penerbangan berdasarkan kepadatan trafik udara di dalam laluan penerbangan (airways) di dalam Kota Kinabalu Flight Information Region (KK FIR). Insiden ini telah dikendalikan oleh TUDM khasnya dan ATM amnya berlandaskan undang-undang dan peraturan penerbangan antarabangsa International Civil Aviation Organization (ICAO) serta Strategi Pertahanan Udara Nasional (SPUN).

Semasa insiden ini berlaku, saya selaku Menteri Luar Negeri telah mengarahkan Wisma Putra untuk mengeluarkan nota bantahan diplomatik kepada Kerajaan Republik Rakyat China (RRC) dan juga memanggil dengan izin “*summon*” Duta Besar RRC ke Malaysia bagi memberikan penjelasan mengenai insiden tersebut. Pada masa itu, saya juga telah menyampaikan kegusaran serius Malaysia mengenai perkara ini kepada rakan sejawat saya sewaktu di China.

Pendirian Malaysia sangat jelas iaitu mempunyai hubungan diplomatik yang mesra dengan mana-mana negara tidak sesekali bermaksud kita akan kompromi kedaulatan negara kita.

Tuan Yang di-Pertua,

Dalam memastikan kestabilan di Laut China Selatan, Kerajaan sentiasa mengutamakan kepentingan negara dalam setiap tindakan yang diambil. Semua agensi keselamatan di negara ini termasuklah TUDM dan Tentera Laut Diraja Malaysia (TLDM) sentiasa komited dalam memastikan kedaulatan dan hak kedaulatan Malaysia di Laut China Selatan kekal terpelihara. Pada masa yang sama, Malaysia sentiasa menekankan agar semua pihak menghormati dan mematuhi undang-undang antarabangsa, termasuk Konvensyen Pertubuhan Bangsa-Bangsa Bersatu Mengenai Undang-Undang Laut 1982 atau UNCLOS 1982.

Ini termasuklah menghormati kedaulatan wilayah dan perairan dan juga kebebasan pelayaran dan penerbangan. Pendirian Malaysia berhubung isu Laut China Selatan adalah jelas dan konsisten. Kesemua pihak harus memastikan keamanan dan kestabilan di kawasan tersebut dan mengelakkan sebarang tindakan yang boleh menimbulkan ketegangan yang sekaligus akan menggugat keamanan, keselamatan dan kestabilan di Laut China Selatan.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB DATUK IGNATIUS DARELL LEIKING
[PENAMPANG]
TARIKH : 6 OKTOBER 2021

SOALAN

Minta **MENTERI SAINS, TEKNOLOGI DAN INOVASI** menyatakan apakah langkah yang akan diambil oleh Kerajaan untuk meningkatkan kadar pemberian vaksin di Sabah terutama kepada rakyat di kawasan luar bandar dan pedalaman selain daripada pendaftaran melalui aplikasi MySejahtera memandangkan kadar pendaftaran melalui aplikasi tersebut dan kadar vaksinasi adalah paling rendah di Malaysia.

JAWAPAN

Sehingga 5 Oktober 2021, pelaksanaan vaksinasi di Sabah mencapai 72.7% populasi dewasa menerima sekurang-kurangnya 1 dos vaksin manakala 62.7% populasi dewasa telah lengkap dos vaksin.

Dari segi agihan bekalan vaksin bulan Ogos, Sabah telah dibekalkan vaksin sebanyak 1.80 juta dos vaksin. Untuk agihan bekalan vaksin bagi bulan September pula, negeri Sabah masih adalah keutamaan dengan jumlah agihan vaksin bagi bulan September adalah sebanyak 2.59 juta dos dengan sejumlah 299,000 dos vaksin jenis Cansino (jumlah agihan

bulan Ogos hingga 1 Oktober 2021) telah diagihkan sebagai strategi vaksinasi penduduk luar bandar atau pedalaman termasuk bukan warganegara seperti PATI, pelarian UNHCR dan golongan tanpa negara di Sabah.

Peratus penggunaan vaksin di negeri Sabah bagi bulan September ialah 77.8% (data 26 September 2021: bekalan vaksin = 4,880,476; jumlah vaksinasi = 3,796,023; baki = 1,084,453). Bagi meningkatkan kadar penggunaan vaksin Sabah, beberapa program *home-to-home*, *outreach* atau capaian komuniti telah dilaksanakan bagi membantu inisiatif Program Imunisasi COVID-19 Kebangsaan (PICK).

Sebanyak 51 buah pasukan telah digerakkan secara jangkauan luar ke setiap daerah di Sabah. Sehingga pada 30 September 2021, program jangkauan luar di Sabah telah selesai pemberian dos berjumlah 533,293 dos dengan pecahan dos pertama sebanyak 373,608 dos manakala bagi pemberian dos kedua sebanyak 159,685 dos.

Walau bagaimanapun, kapasiti pelaksanaan vaksinasi Sabah akan dipertingkatkan melalui lebih banyak program jangkauan luar (*outreach*) bagi mencapai sasaran vaksinasi yang ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' SERI TIONG KING SING (BINTULU)

TARIKH : 6 OKTOBER 2021 (RABU)

SOALAN

DATO' SERI TIONG KING SING (BINTULU) minta **PERDANA MENTERI** menyatakan :-

(a) apakah langkah-langkah drastik Kerajaan dalam usaha membendung pandemik COVID-19 yang telah meragut lebih daripada 13,000 nyawa; dan

(b) apakah usaha Kerajaan dalam memulihkan ekonomi negara yang terkesan akibat pandemik COVID-19

JAWAPAN

**YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS TUGAS KHAS)**

Tuan Yang Di-Pertua,

1. Kerajaan akan sentiasa berusaha untuk mengimbangi antara keperluan kesihatan awam dan pemulihan semula ekonomi. Oleh itu, antara langkah drastik yang telah diambil adalah dengan mempercepatkan kadar vaksinasi penduduk Malaysia dengan sasaran

negara mencapai imuniti kelompok pada penghujung Oktober 2021 dengan sasaran 80% populasi dewasa menerima vaksin lengkap. Malaysia adalah antara negara di dunia yang pantas menggerakkan usaha bagi program vaksinasi dalam menangani penularan COVID-19.

2. Malaysia telah melaksanakan pelbagai agenda bagi menangani penularan pandemik COVID-19, termasuk pelaksanaan Pelan Pemulihan Negara (PPN) secara berfasa dengan masih melaksanakan Perintah Kawalan Pergerakan Diperketatkan (PKPD) di beberapa lokaliti.

3. Tidak hanya tertumpu kepada usaha memutuskan rantai penularan, Kerajaan juga akan terus memastikan dalam tempoh PPN itu, rakyat, perniagaan dan ekonomi juga tidak terabai.

4. Kerajaan telah melaksanakan pelbagai pakej rangsangan dan bantuan bernilai RM530 bilion sejak bulan Mac tahun 2020 dan dilengkapi oleh Belanjawan 2021 bernilai RM322.5 bilion. Melalui pakej dan langkah dalam Belanjawan 2021 tersebut, lebih daripada RM300 bilion masih tersedia untuk tahun ini bagi menyokong pemulihan ekonomi sepanjang pelaksanaan pelbagai fasa PPN.

5. Dalam pelan jangka sederhana Kerajaan, pelaksanaan kerangka kerja Aspirasi Pelaburan Nasional (NIA) dan inisiatif PERKUKUH Pelaburan Rakyat akan dilaksanakan. Selain itu, Rancangan Malaysia Kedua Belas, 2021 – 2025 juga akan menyediakan rangka tindakan untuk memastikan pertumbuhan mampan, keterangkuman sosio-ekonomi dan kelestarian alam sekitar bagi jangka sederhana.

6. Bukan itu sahaja, melalui Kenyataan Pra-Bajet 2022 (2022 *Pre-Budget Statement*) yang diterbitkan pada 31 Ogos 2021, Kerajaan telah menyatakan bahawa Bajet 2022 dirangka dengan matlamat untuk terus melindungi dan memulih kehidupan serta mata pencarian rakyat, membina semula daya tahan ekonomi negara dan memangkin pembaharuan sosioekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

**PERTANYAAN : LISAN
DARIPADA : Y.B. DATO' SERI UTAMA HAJI MUKHRIZ
BIN TUN DR. MAHATHIR [JERLUN]**

TARIKH : 06 OKTOBER 2021 (RABU)

SOALAN

Dato' Seri Utama Haji Mukhriz Bin Tun Dr. Mahathir [Jerlun] minta **MENTERI KANAN PERDAGANGAN ANTARABANGSA DAN INDUSTRI** menyatakan situasi pelaburan dan perindustrian di dalam negara yang terkesan akibat pandemik COVID-19 :-

(a) permohonan pelaburan baharu dan jenis industri; dan

(b) permohonan atau pemakluman industri milik asing untuk memindahkan operasi keluar negara.

JAWAPAN

Tuan Yang di-Pertua,

1. Mulai tahun 2020, negara berdepan dengan cabaran akibat penularan pandemik COVID-19 yang bukan sahaja menjejaskan kesihatan awam di seluruh dunia tetapi memberi kesan terhadap aliran perdagangan dan pelaburan global, termasuk rantai bekalan dan mobiliti barangan serta perkhidmatan dan aktiviti pembuatan, berikutan pelaksanaan langkah kawalan pergerakan oleh kebanyakan negara dalam usaha memerangi wabak ini.

2. Di sebalik persekitaran ekonomi global yang mencabar dan tidak menentu ini, Malaysia telah berjaya menarik sejumlah RM167.4 bilion nilai pelaburan melibatkan 4,756 projek dalam sektor perkilangan, perkhidmatan dan utama pada tahun 2020. Pelaburan dalam sektor perkilangan mencatatkan peningkatan yang memberangsangkan sebanyak 10.3% kepada RM91.3 bilion daripada RM82.7 bilion pada tahun 2019.

3. Ini adalah hasil usaha gigih dan berterusan daripada Kementerian Perdagangan Antarabangsa dan Industri (MITI), Lembaga Pembangunan Pelaburan Malaysia (MIDA) dan semua agensi penggalakan pelaburan yang komited untuk memastikan Malaysia kekal menjadi destinasi mesra dan kondusif bagi pelabur untuk pertumbuhan jangka panjang syarikat-syarikat asing dan domestik.

4. Seterusnya, tahun 2021 menunjukkan pencapaian yang lebih kukuh apabila negara merekodkan kelulusan pelaburan swasta bernilai RM107.5 bilion dalam sektor perkilangan, perkhidmatan dan utama dalam tempoh Januari sehingga Jun 2021. Jumlah kelulusan ini menunjukkan lonjakan sebanyak 69.8% berbanding RM63.3 bilion pada tempoh yang sama pada tahun 2020. Pelaburan yang diluluskan ini melibatkan 2,110 projek dan dijangka menjana lebih 44,000 peluang pekerjaan. Jumlah pelaburan langsung asing (FDI) secara keseluruhan telah meningkat sebanyak 215.7% kepada RM62.5 bilion bagi tempoh Januari 2021 hingga Jun 2021 berbanding RM19.8 bilion pada tempoh yang sama

tahun lepas. Pelaburan langsung domestik (DDI) menyumbang baki selebihnya iaitu sebanyak RM45 bilion, atau 41.9% kepada jumlah pelaburan yang diluluskan dalam ketiga-tiga sektor ini.

Tuan Yang di-Pertua,

5. Sektor perkilangan terus memainkan peranan penting dalam memacu transformasi ekonomi negara bagi tempoh separuh pertama tahun 2021 yang menyumbang kelulusan pelaburan sebanyak RM66.9 bilion menerusi 367 projek. Ini merangkumi 62.2% daripada jumlah keseluruhan pelaburan swasta yang direkodkan pada separuh pertama tahun tersebut. Kelulusan ini mencatatkan peningkatan sebanyak 83.9% berbanding RM36.4 bilion nilai projek perkilangan yang telah diluluskan dalam tempoh yang sama tahun lalu.

6. Industri utama di bawah sektor perkilangan dengan pelaburan tertinggi adalah produk elektronik dan elektrik – E&E (RM47.1 bilion), produk logam fabrikasi (RM5.1 bilion), kimia dan produk kimia (RM3.8 bilion), pengilangan makanan (RM3.7 bilion), produk getah (RM3.6 bilion), kelengkapan pengangkutan (RM824.1 juta), jentera dan kelengkapan (RM698.3 juta) serta industri kertas, percetakan dan penerbitan (RM426.0 juta).

7. Sehingga Julai 2021, MIDA telah menerima permohonan melibatkan 835 projek dengan cadangan pelaburan bernilai RM76.7 bilion dalam sektor perkilangan (RM18.7 bilion) dan perkhidmatan di bawah MIDA (RM58 bilion) yang pada masa ini sedang dalam pertimbangan untuk kelulusan. MIDA juga telah mengenalpasti sejumlah 325 projek berprofil tinggi yang sedang dalam rundingan yang melibatkan pelaburan berjumlah RM97.4 bilion dan dijangka dapat dimuktamadkan pada tahun ini. Hal ini menunjukkan walaupun berdepan dengan kemelut pandemik, Malaysia terus menjadi destinasi pelaburan pilihan, melalui pelbagai strategi dan inisiatif yang dilaksanakan.

Tuan Yang di-Pertua,

8. Bagi tempoh pandemik COVID-19 (Mac 2020-Mei 2021), terdapat sembilan (9) buah syarikat pengilangan asing telah menutup operasi di Malaysia yang melibatkan sektor tekstil, besi keluli, jentera, bahan binaan dan E&E. Penutupan kesemua syarikat tersebut telah melibatkan pelaburan sebanyak RM393.6 juta dan pemberhentian seramai 6,628 orang pekerja di mana seramai 4,597 orang adalah pekerja tempatan.

9. Diperhatikan bahawa kebanyakan syarikat-syarikat pelabur asing yang telah menutup operasi adalah daripada sektor tekstil yang telah melabur sebanyak RM182 juta iaitu Esquel Malaysia Sdn. Bhd., Pulau Pinang (RM73 juta), Esquel Malaysia (Kelantan) Sdn. Bhd. (RM4 juta) dan Pen Apparel Sdn. Bhd. (RM 105 juta). Antara punca utama penutupan operasi syarikat adalah penguncupan ekonomi global serta penurunan dalam jualan dan permintaan lemah dari luar negara disebabkan oleh pandemik COVID-19.

10. Selain itu, syarikat asing yang melabur di bawah sektor besi keluli dan jentera juga turut terkesan seperti Bekaert Ipoh Sdn. Bhd., HOWCO Metal Management Malaysia Sdn. Bhd. dan Transnorm System Sdn. Bhd. dengan jumlah pelaburan sebanyak RM113 juta. Pihak syarikat menyatakan punca penutupan adalah disebabkan oleh peningkatan dalam kos operasi, persaingan daripada pengeluar yang sama di pasaran tempatan dan luar negara, tiada permintaan bagi produk yang dikeluarkan dan juga penstrukturan semula syarikat.

Tuan Yang di-Pertua,

11. Sementara syarikat-syarikat lain adalah Tereal Malaysia Sdn. Bhd., Sika Kimia Sdn. Bhd. dan Sony EMCS yang terlibat dalam pengeluaran bahan binaan dan E&E yang telah melabur sebanyak RM98.6 juta. Faktor penutupan syarikat adalah juga disebabkan daripada penurunan permintaan daripada pelanggan yang mengakibatkan kerugian kewangan terkumpul syarikat serta penstrukturan semula syarikat.

12. Namun begitu, dalam masa yang sama, negara terus berjaya menarik syarikat-syarikat digital utama dunia ke Malaysia seperti Microsoft untuk terus melabur di Malaysia. Microsoft yang dijangka akan

melabur sebanyak RM4.2 bilion bagi menubuhkan tiga buah pusat data bermula di Cyberjaya. Microsoft turut bercadang untuk melatih seramai 1 juta rakyat Malaysia bagi jangka masa tiga tahun. Ini memberi gambaran yang jelas kepada pelabur bahawa syarikat utama global seperti Microsoft mempunyai keyakinan kukuh terhadap dasar ekonomi dan pendekatan ke atas penyediaan modal insan oleh Kerajaan di samping infrastruktur moden yang dimiliki negara ini. Pelaburan Microsoft ini akan menjana pendapatan sekitar RM19 bilion kepada rakan tempatan (*local partners*) dan *cloud-consuming customers* bagi tempoh empat tahun mendatang, serta menyumbang kepada kewujudan 19,000 peluang pekerjaan baharu secara langsung dan tidak langsung dalam jangka tempoh yang sama.

13. Oleh yang demikian, Kerajaan akan terus berusaha untuk melaksanakan langkah-langkah strategik dalam mengekalkan Malaysia sebagai destinasi pilihan pelaburan berkualiti tinggi yang kompetitif dan berdaya saing meskipun dalam tempoh pandemik COVID-19 ini. Usaha ini adalah untuk menstabilkan ekonomi negara demi kesejahteraan dan kelangsungan hidup rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 06 OKTOBER 2021 (RABU)

SOALAN

PUAN WONG SHU QI [KLUANG] minta **PERDANA MENTERI** menyatakan status terkini Laporan Jawatankuasa Pembaikan Sistem dan Undang-Undang Pilihan Raya (ERC) mengenai urusan memperbaiki pilihan raya dan persediaan SPR untuk mengkaji perjalanan pilihan raya yang lebih selamat dan telus ketika pandemik.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Laporan Akhir Jawatankuasa Pembaikan Sistem dan Undang-Undang Pilihan Raya (ERC) yang mengandungi 49 syor akan diteliti oleh sebuah Jawatankuasa Khas Kabinet. Jawatankuasa Khas Kabinet yang ditubuhkan ini meneliti semua syor yang dikemukakan serta mengkaji kesesuaian pelaksanaannya. Ini kerana syor-syor ERC melibatkan perundangan dan bidang kuasa pelbagai kementerian. Selain itu, syor-syor itu juga memerlukan pindaan ke atas sistem pilihan raya, undang-undang termasuklah pindaan kepada Perlembagaan Persekutuan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG HON WAI
[BUKIT BENDERA]**

TARIKH : 6 OKTOBER 2021 (RABU)

SOALAN

TUAN WONG HON WAI [BUKIT BENDERA] minta **PERDANA MENTERI** menyatakan dasar-dasar baru yang dilaksanakan oleh Kerajaan Perikatan Nasional sejak Mac 2020 dan sama ada dasar tersebut mencapai sasaran yang ditetapkan.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Kerajaan sentiasa komited dalam memastikan kestabilan negara menjadi agenda utama ke arah pemulihan negara memerangi pandemik Covid-19 serta memulihkan ekonomi.

2. Dalam hubungan ini, Kerajaan Keluarga Malaysia akan meneruskan apa jua dasar-dasar sedia yang mengutamakan kepentingan rakyat dan negara. Antara lain dasar-dasar yang diteruskan adalah seperti berikut:

- i) **Dasar Pelaburan Baharu Berteraskan Aspirasi Pelaburan Nasional (NIA)** – Kementerian Perdagangan Antarabangsa dan Industri
- ii) **Agenda Kertas Putih Pertahanan** – Kementerian Pertahanan
- iii) **Pakej Rangsangan Ekonomi 2020** – Kementerian Kewangan
- iv) **Dasar Agromakanan Negara 2021-2030 (DAN 2.0)** – Kementerian Petanian dan Industri Makanan
- v) **Dasar Penguatkuasaan Prihatin** – Kementerian Perdagangan Dalam Negeri dan Hal Ehwal Pengguna
- vi) **Pelan Tindakan Jalinan Digital Negara (JENDELA)** – Kementerian Komunikasi dan Multimedia

- vii) **Agenda Nasional Malaysia Sihat (ANMS)** – Kementerian Kesihatan Malaysia
- viii) **Dasar Perpaduan Negara (DPN)** – Kementerian Perpaduan Negara
- ix) **Pelan Strategik Kebolehpasaran Graduan 2021-2025, Pelan Pendigitalan Pendidikan Tinggi Negara & Pelan Tindakan Keusahawanan Institusi Pendidikan Tinggi 2021** – Kementerian Pengajian Tinggi

3. Dalam masa sama, Kerajaan Keluarga Malaysia juga menambah baik dasar-dasar sedia ada demi kepentingan rakyat. Sebagai contoh, tindakan komprehensif yang telah diambil oleh Kerajaan untuk melaksanakan perancangan bagi mensasarkan Malaysia memasuki fasa endemik Covid-19 menjelang pertengahan Oktober 2021.

4. Justeru, Kerajaan akan memastikan semangat Keluarga Malaysia akan sentiasa diterapkan dengan mengenepikan apa jua ideologi politik demi kebaikan rakyat dan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHAN FOONG HIN
[KOTA KINABALU]**

TARIKH : 06 OKTOBER 2021 (RABU)

SOALAN

TUAN CHAN FOONG HIN [KOTA KINABALU] minta **PERDANA MENTERI** menyatakan adakah kenyataan Pengerusi Suruhanjaya Pilihan Raya (SPR) Datuk Abdul Ghani Salleh bahawa pandemik COVID-19 bukan halangan untuk mengadakan Pilihan Raya Umum Ke-15 merupakan pendirian rasmi Kerajaan. Adakah SPR menjalankan apa-apa kajian mengadakan pilihan raya umum sekiranya pembubaran Parlimen berlaku dalam tempoh pandemik.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, SPR sebagai sebuah badan yang dipertanggungjawab untuk mengendali dan menguruskan pilihan raya di negara ini perlu membuat persediaan dan persiapan sewajarnya bagi menghadapi PRU ke-15 di mana tempoh hayat Dewan Rakyat Ke-14 akan berakhir pada tahun 2023. Persediaan bagi melaksanakan PRU yang merangkumi semua aspek seperti keperluan sumber manusia, kewangan, logistik dan latihan perlu dimulakan dua tahun lebih awal bagi memastikan ianya berjalan dengan lancar dan teratur. ini merangkumi semua aspek seperti keperluan sumber manusia, kewangan, logistik dan latihan.

Antara perkara utama dalam PRU Ke-15 ini adalah penyediaan Garis Panduan Pencegahan COVID-19 Bagi Pilihan Raya dalam memastikan proses pilihan raya dapat dijalankan dalam keadaan paling selamat ketika negara dilanda pandemik virus COVID-19.

Dalam garis panduan berkenaan, SPR sedang mengatur ketetapan agar amalan penjarakan fizikal dan pematuhan yang tinggi dalam segala proses seperti proses penamaan calon, proses berkempen dan pengundian. Kepatuhan garis panduan ini tidak hanya tertumpu kepada pengundi dan petugas pilihan raya yang hadir pada hari mengundi sahaja malah akan juga memberi fokus kepada semua calon dan parti yang terlibat sepanjang tempoh berkempen berlangsung.

SPR sentiasa mendapatkan nasihat dan pandangan daripada Majlis Keselamatan Negara (MKN) dan Kementerian Kesihatan Malaysia (KKM) bagi meneliti serta mengemaskini garis panduan pencegahan COVID-19, selaras dengan keadaan dan situasi semasa pandemik ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 6 OKTOBER 2021 (RABU)

SOALAN

TUAN KHOO POAY TIONG [KOTA MELAKA] minta **PERDANA MENTERI** menyatakan apakah program-program dan kejayaan-kejayaan utama Jabatan Komunikasi Komuniti (J-KOM) sejak ditubuhkan dan berapa perbelanjaan yang telah digunakan oleh jabatan tersebut, termasuklah jumlah perjawatan.

JAWAPAN

**YB DATUK DR. ABD LATIFF BIN AHMAD,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. J-KOM telah dijenamakan semula berkuatkuasa pada 01 Feb 2021 untuk membangun komuniti, khususnya di peringkat akar umbi, yang mengamalkan budaya ilmu, berkemahiran digital dan menghayati makna dan fokus patriotisme dengan menggunakan pendekatan 'pengehakupayaan komuniti' (community empowerment). Perjawatan yang diluluskan adalah seramai 155 perjawatan tetap yang melibatkan seramai 61 perjawatan di Ibu Pejabat dan 94 perjawatan di Pejabat Zon.

2. Sehingga kini sebanyak 9 program telah dilaksanakan melibatkan komuniti Orang Kurang Upaya (OKU), petugas barisan hadapan dan pesakit Covid-19, pihak media serta penjawat awam. Kejayaan utama J-KOM setakat ini ialah telah melaksanakan inisiatif tanpa perbelanjaan dengan menyediakan sebanyak 291 kandungan kreatif seperti poster, video, foto dan lain-lain. Kandungan tersebut telah dibuat hantaran (posting) dan ciapan (tweet) pada media sosial Jabatan seperti Facebook, Instagram, Twitter dan WhatsApp. Ini selaras dengan hala tuju Jabatan dalam Program Komunikasi Strategik Pembudayaan Norma Baharu COVID-19,

3. Manakala perbelanjaan J-KOM setakat 26 Ogos 2021 berjumlah RM321.5 ribu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI DR. WAN AZIZAH WAN ISMAIL (PANDAN)

TARIKH : 06 OKTOBER 2021 (RABU)

SOALAN

DATO' SERI DR. WAN AZIZAH WAN ISMAIL (PANDAN) minta **PERDANA MENTERI** menyatakan apakah status terkini proses pemansuhan Seksyen 309 Kanun Keseksaan yang menjadikan cubaan bunuh diri sebagai satu jenayah memandangkan cubaan membunuh diri adalah disebabkan oleh keadaan kesihatan mental yang perlu dirawat dan bukannya dihukum.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Kerajaan melalui Jabatan Peguam Negara (AGC) telah mengambil inisiatif untuk mengkaji undang-undang berkenaan dengan kesalahan persubahatan dan percubaan membunuh diri di Malaysia kerana berdasarkan statistik setakat 2015 insiden percubaan membunuh diri semakin meningkat dan meliputi pelbagai peringkat umur. Isu percubaan membunuh diri menjadi lebih meruncing pada masa ini kerana keadaan ekonomi yang tidak menentu menjadikan ramai kehilangan sumber pendapatan atau hilang pekerjaan. Oleh yang demikian, pendekatan yang lebih holistik perlu diambil untuk mengekang perbuatan tersebut.

SOALAN NO : 25

Berdasarkan hasil kajian perbandingan peruntukan undang-undang mengenai percubaan untuk membunuh diri di United Kingdom, New Zealand, India dan Singapura, didapati negara-negara tersebut telah mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan. Ini bermakna percubaan membunuh diri bukan lagi suatu kesalahan jenayah di negara-negara tersebut.

Oleh itu, berdasarkan perkembangan undang-undang berkaitan di negara yang dikaji, AGC sedang menimbang cadangan daripada pihak berkepentingan untuk mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan bagi mendapatkan rawatan yang sewajarnya.

AGC juga sedang meneliti dengan lebih lanjut pilihan perundangan yang ada serta implikasi perundangan sekiranya kesalahan percubaan membunuh diri dikeluarkan daripada sistem keadilan jenayah. Di samping itu, AGC sedang meneliti keperluan untuk meminda undang-undang lain yang berbangkit daripada pengeluaran kesalahan percubaan membunuh diri daripada sistem jenayah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN HANNAH YEOH TSEOW SUAN
(SEGAMBUT)**

TARIKH : 06 OKTOBER 2021 (RABU)

SOALAN

PUAN HANNAH YEOH TSEOW SUAN (SEGAMBUT) minta **PERDANA MENTERI** menyatakan jumlah perbelanjaan yang diperuntukkan untuk penyediaan sistem khidmat pesanan ringkas (SMS) bagi menyalurkan maklumat mengenai COVID-19 kepada pemilik nombor telefon sepanjang pandemik bermula Mac 2020 sehingga Ogos 2021, nyatakan kos, pihak dan cara penentuan setiap kandungan SMS.

JAWAPAN

YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)

Tuan Yang DiPertua,

1. Suruhanjaya Komunikasi dan Multimedia Malaysia (MCMC) telah bekerjasama dengan Majlis Keselamatan Negara, Jabatan Perdana Menteri (MKN, JPM), Kementerian Kesihatan Malaysia (KKM) dan 13 penyedia perkhidmatan telekomunikasi (Celcom, Digi, Maxis, UMobile, ALTEL, Webe, Tune Talk, Pavocomms, YTL, XOX, Redtone, Red One dan Merchantrade) untuk melaksanakan hebahan Pesanan Khidmat

Awam (PKA) melalui sistem khidmat pesanan ringkas (SMS) kepada orang ramai bagi menyampaikan maklumat serta khidmat nasihat berkaitan pengurusan pandemik COVID-19. Selain dari SMS, hebahan maklumat ini turut disampaikan melalui platform media sosial, TV dan radio.

2. Inisiatif ini telah bermula sejak 26 Februari 2020 dan sehingga 27 Ogos 2021 sejumlah 335 kandungan SMS telah dihantar oleh penyedia perkhidmatan telekomunikasi kepada lebih kurang 38.6 juta pelanggan telekomunikasi dengan jumlah penghantaran mencapai 12.7 billion SMS. Pihak penyedia perkhidmatan tidak mengenakan sebarang caj untuk perkhidmatan SMS ini (kadar sifar) atas dasar tanggungjawab sosial korporat.

3. Kandungan hebahan PKA ini ditentukan dan dipilih secara bersama oleh pihak MKN, KKM, Jabatan Perdana Menteri (JPM) dan SKMM berpandukan keputusan-keputusan penting yang dibuat dalam sidang MKN dan situasi semasa pandemik. Teks hebahan akan digubal mengikut syarat-syarat perkhidmatan SMS (had aksara, indikator harga RM0, akses ke pautan dan lain-lain) dan semakan butiran fakta/informasi dan angka dengan kementerian/agensi berkaitan bagi pengesahan. Kandungan hebahan SMS yang telah dimuktamadkan/dipersetujui oleh semua pihak akan diedarkan oleh pihak MCMC kepada penyedia perkhidmatan untuk dihantar kepada semua pelanggan telekomunikasi mengikut tarikh yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI (KLUANG)

TARIKH : 06 OKTOBER 2021 (RABU)

SOALAN

PUAN WONG SHU QI (KLUANG) minta **PERDANA MENTERI** menyatakan status terkini pindaan Seksyen 309 dan 306 Kanun Keseksaan untuk menyalahjenayah cubaan bunuh diri.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Kerajaan melalui Jabatan Peguam Negara (AGC) telah mengambil inisiatif untuk mengkaji undang-undang berkenaan dengan kesalahan persubahatan dan percubaan membunuh diri di Malaysia kerana berdasarkan statistik setakat 2015 insiden percubaan membunuh diri semakin meningkat dan meliputi pelbagai peringkat umur. Isu percubaan membunuh diri menjadi lebih meruncing pada masa ini kerana keadaan ekonomi yang tidak menentu menjadikan ramai kehilangan sumber pendapatan atau hilang pekerjaan. Oleh yang demikian, pendekatan yang lebih holistik perlu diambil untuk mengekang perbuatan tersebut.

SOALAN NO : 27

Berdasarkan hasil kajian perbandingan peruntukan undang-undang mengenai percubaan untuk membunuh diri di United Kingdom, New Zealand, India dan Singapura, didapati negara-negara tersebut telah mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan. Ini bermakna percubaan membunuh diri bukan lagi suatu kesalahan jenayah di negara-negara tersebut.

Oleh itu, berdasarkan perkembangan undang-undang berkaitan di negara yang dikaji, AGC sedang menimbang cadangan daripada pihak berkepentingan untuk mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan bagi mendapatkan rawatan yang sewajarnya.

AGC juga sedang meneliti dengan lebih lanjut pilihan perundangan yang ada serta implikasi perundangan sekiranya kesalahan percubaan membunuh diri dikeluarkan daripada sistem keadilan jenayah. Di samping itu, AGC sedang meneliti keperluan untuk meminda undang-undang lain yang berbangkit daripada pengeluaran kesalahan percubaan membunuh diri daripada sistem jenayah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN LIM KIT SIANG [ISKANDAR
PUTERI]**

TARIKH : 06 OKTOBER 2021 (RABU)

SOALAN

Tuan Lim Kit Siang [Iskandar Puteri] minta **PERDANA MENTERI** menyatakan sama ada Kerajaan berhasrat untuk membentangkan apa-apa akta untuk menetapkan tempoh penggal sesuatu sidang Parlimen seperti yang diperuntukkan Akta Penggal Parlimen Tetap di United Kingdom.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Berdasarkan Perkara 55(3) Perlembagaan Persekutuan, Parlimen hendaklah terus berjalan selama lima (5) tahun dari tarikh mesyuarat pertamanya dan selepas itu adalah terbubar, melainkan jika ia dibubarkan terlebih dahulu.

SOALAN NO : 28

Antara keadaan yang boleh menyebabkan Parlimen dibubarkan lebih awal (sebelum tempoh lima tahun tamat) ialah Yang di-Pertuan Agong atas nasihat Jemaah Menteri membubarkan Parlimen menurut Perkara 55(1) dan sekiranya Perdana Menteri (yang tidak lagi mendapat kepercayaan majoriti ahli Dewan Rakyat) memohon untuk Yang di-Pertuan Agong membubarkan Parlimen di bawah Perkara 43(4) PP yang dibaca bersama dengan Perkara 40(2)(b) PP.

Penjelasan mengenai tempoh Parlimen dinyatakan dalam Laporan Suruhanjaya Reid di perenggan 69 seperti yang berikut:

“69. We recommend (Art. 47) that **the duration of each Parliament should be five years subject to power of dissolution at any time within the life of the Parliament, and that the Constitutional responsibility for dissolving Parliament should rest with the Yang di-Pertuan Besar** [Art. 35 (b)]. Experience has shown that there are substantial objections to the Prime Minister or Government of the day having unrestricted power to insist on a dissolution of Parliament. A Prime Minister may ask for a dissolution in various circumstances and it is not possible to define the circumstances in which his request ought to be granted. Normally the Yang di-Pertuan Besar would accept the advice of his Prime Minister but he should not be bound to do so in all cases. He ought in a critical case to be free to decide what is in the best interests of the country. We recommend (Art. 36) that if the Prime Minister ceases to command the confidence of the House of Representatives he must either vacate his office or ask for a dissolution. If the Prime Minister asks for a dissolution and the Yang di-Pertuan Besar refuses this request, then the Prime Minister must vacate his office...”.

Selepas Parlimen dibubarkan, Perkara 55(4) Perlembagaan Persekutuan menyatakan bahawa dalam tempoh enam puluh (60) hari dari tarikh pembubaran, pilihan raya umum diadakan. Persidangan Parlimen hendaklah ditetapkan pada satu tarikh yang tidak melebihi seratus dua puluh (120) hari dari tarikh pembubarannya.

Fixed Term Parliament Act 2011 (FTPA) telah mula diperkenalkan di United Kingdom pada tahun 2011 yang secara umumnya bertujuan untuk

SOALAN NO : 28

mengadakan peruntukan khusus mengenai pembubaran Parlimen dan penentuan hari pengundian untuk pilihan raya umum. FTPA membolehkan pilihan raya umum diadakan pada satu tarikh yang tetap.

Sekiranya “Kerajaan berhasrat menetapkan tempoh penggal” seperti undang-undang United Kingdom, perkara itu perlu dikaji dengan lebih lanjut dengan mengambil kira peruntukan-peruntukan sedia ada dalam Perlembagaan Persekutuan.

Untuk makluman Yang Berhormat, tiada perancangan untuk akta tersebut dalam masa yang terdekat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN SANISVARA NETHAJI RAYER
A/L RAJAJI [JELUTONG]**

TARIKH : 6 OKTOBER 2021 (RABU)

SOALAN

Minta **PERDANA MENTERI** menyatakan adakah Kerajaan bercadang untuk membentangkan satu rang undang-undang untuk memastikan bahawa lompat parti diharamkan di negara kita kerana sejarah menunjukkan bahawa tindakan lompat parti seperti yang telah berlaku baru-baru ini boleh menjahanamkan negara kita.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Pengenalan Rang Undang-Undang Anti-Lompat Parti merupakan salah satu daripada Agenda Transformasi Kerajaan yang bertujuan memastikan reformasi dan pembaharuan dalam pentadbiran Kerajaan khususnya memperkasakan peranan institusi Parlimen. Kerajaan komited untuk memastikan Rang Undang-Undang Anti-Lompat Parti yang akan digubal dapat melindungi hak rakyat negara ini yang memberi undi serta kepercayaan tinggi kepada ahli politik ketika proses pilihan raya dan memastikan sistem demokrasi berparlimen yang efektif.
2. Bagi maksud perkara ini dan dengan mengambil kira kewajaran untuk pembentangan dilaksanakan secepat mungkin, Kerajaan tidak akan berkompromi terhadap keperluan untuk sesi libat urus yang menyeluruh diadakan bersama pihak berkepentingan, badan bukan Kerajaan, ahli Parlimen Kerajaan dan Pembangkang serta rakyat agar Rang Undang-Undang baharu yang diperkenalkan mendapat sokongan semua pihak. Kerajaan akan memastikan cadangan dan input semua pihak berkepentingan termasuk daripada ahli Parlimen Kerajaan dan Pembangkang serta badan bukan Kerajaan diperhalusi dan dipertimbangkan melalui sesi libat urus yang menyeluruh sebelum menetapkan hala tuju dan parameter gubalan undang-undang ini.
3. Ini adalah untuk memastikan Rang Undang-Undang ini sebaiknya tidak bertentangan dengan Perlembagaan Persekutuan atau undang-undang lain yang berkuat kuasa termasuk di peringkat negeri. Dalam perkara ini, Jabatan Perdana Menteri sedang bekerjasama dengan Jabatan Peguam Negara untuk mengkaji penyediaan undang-undang bagi menangani isu lompat parti. Kerajaan memberi jaminan bahawa RUU ini yang termasuk di dalam Perjanjian Persefahaman Transformasi dan Kestabilan Politik akan dilaksanakan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN VIVIAN WONG SHIR YEE
[SANDAKAN]**

TARIKH : 06 OKTOBER 2021 (RABU)

SOALAN

Puan Vivian Wong Shir Yee [Sandakan] minta **PERDANA MENTERI** menyatakan apakah langkah diambil oleh Kerajaan supaya warganegara Malaysia berumur 18 tahun akan dibenarkan untuk mengundi pada Pilihan Raya Umum ke-15 akan datang.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, **pindaan kepada Perkara 119 Perlembagaan Persekutuan yang diluluskan oleh Parlimen pada Mesyuarat Kedua Penggal Kedua Parlimen Keempat Belas adalah meliputi umur kelayakan pengundi 18 tahun bersekali dengan pendaftaran pemilih secara automatik.** Bagi maksud tersebut, Suruhanjaya Pilihan Raya (SPR) sedang dalam persiapan untuk melaksanakan kedua-duanya selaras dengan pindaan tersebut.

Persiapan yang sedang dilaksanakan oleh SPR ini adalah meliputi pindaan kepada Peraturan-Peraturan Pilihan Raya (Pendaftaran Pemilih) 2002 dan undang-undang lain yang berkaitan, penyediaan standard operating procedures (SOP) dan penyediaan sistem serta infrastruktur bagi pelaksanaan umur kelayakan pengundi 18 tahun dan pendaftaran pemilih secara automatik.

Di samping itu, SPR juga telah mengenal pasti beberapa tindakan yang perlu dilaksanakan sebelum pelaksanaan umur kelayakan pengundi 18 tahun dan pendaftaran pemilih secara automatik. Antaranya ialah membuat semakan maklumat bakal pemilih, semakan di lapangan yang melibatkan bakal pengundi berumur 90 tahun dan ke atas, semakan di lapangan ke atas alamat untuk memastikan penentuan bahagian pilihan raya yang tepat, sesi libat urus dengan semua pihak-pihak yang berkepentingan, program pendidikan pengundi kepada bakal pemilih dan menyemak keperluan logistik bagi persediaan menghadapi Pilihan Raya Umum Ke-15 yang akan datang.

SOALAN NO : 30

SPR menjangkakan semua persiapan yang sedang diambil tindakan termasuklah menangani isu-isu yang berkaitan ini akan dapat diselesaikan dan seterusnya melaksanakan umur kelayakan pengundi 18 tahun dan pendaftaran pemilih secara automatik selewat-lewatnya pada September 2022.

Namun demikian, keputusan semakan kehakiman isu Undi 18 di Mahkamah Tinggi Kuching telah memerintahkan supaya umur kelayakan pengundi 18 tahun dan pendaftaran pemilih secara automatik dilaksanakan selewat-lewatnya pada 31 Disember 2021.

Justeru, walaupun dengan kekangan dan kekurangan, **SPR komited untuk memastikan umur kelayakan pengundi 18 tahun dan pendaftaran pemilih secara automatik dilaksanakan berdasarkan kepada keputusan mahkamah.**

Oleh yang demikian, kelayakan warganegara berumur 18 tahun untuk mengundi dalam Pilihan Raya Umum Ke-15 adalah **tertakluk penguatkuasaan umur kelayakan pengundi 18 tahun dan mereka telah didaftarkan dan disahkan sebagai pemilih berdaftar sebelum berlakunya pembubaran Parlimen Ke-14.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN FONG KUI LUN (BUKIT BINTANG)

TARIKH : 06 OKTOBER 2021 (RABU)

SOALAN

TUAN FONG KUI LUN [BUKIT BINTANG] minta **PERDANA MENTERI** menyatakan sejak pelaksanaan undang-undang darurat di Malaysia, berapa jumlah kos yang telah dibelanjakan oleh Kerajaan bagi menguatkuasakan Proklamasi Darurat itu.

JAWAPAN

**YB DATUK DR ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Dalam tempoh Proklamasi Darurat dari 11 Januari 2021 hingga 1 Ogos 2021, Kerajaan telah membelanjakan sejumlah peruntukan bagi membiayai pemerolehan vaksin dan perbelanjaan berkaitan Program Imunisasi COVID-19 Kebangsaan (PICK) menggunakan dana Kumpulan Wang Amanah Negara (KWAN) di bawah Ordinan Darurat (Kumpulan Wang Amanah Negara) (Pindaan) 2021.
2. Dalam tempoh 21 April 2021 sehingga 30 Jun 2021, sejumlah RM 501.9 juta telah dibelanjakan. Bagi bulan Julai 2021, sejumlah RM 803.9 juta diunjur dibelanjakan, manakala bagi tempoh 1 Ogos 2021 sehingga 31 Disember 2021 pula, adalah diunjurkan sejumlah RM 2.54 bilion bakal dibelanjakan oleh KKM dan MOSTI.
3. Kos bagi membiayai inisiatif dan tindakan oleh agensi penguatkuasaan di bawah lain-lain Ordinan Darurat adalah menggunakan peruntukan kementerian/agensi masing-masing seperti yang telah diperuntukkan dalam Belanjawan 2021 atau peruntukan tambahan yang diluluskan oleh Kementerian Kewangan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISSAH MUNIRAH MAJILIS
(KOTA BELUD)**

TARIKH : 06 OKTOBER 2021 (RABU)

SOALAN

PUAN ISNARAISSAH MUNIRAH MAJILIS (KOTA BELUD) minta **PERDANA MENTERI** menyatakan rasional di sebalik tindakan mengetepikan penglibatan Wakil Rakyat Parlimen dan Dewan Undangan Negeri dari pembangkang dalam sesi libat urus berkenaan dengan perihal kesihatan awam yang meliputi COVID-19 yang diletakkan di bawah tanggungjawab Majlis Tindakan Daerah dan mesyuarat-mesyuarat berkaitan yang lain.

JAWAPAN

**YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang DiPertua,

1. Pihak Kerajaan sentiasa mengutamakan kepentingan rakyat dalam menangani pandemik COVID-19. Dalam hal ini, keputusan-keputusan dasar yang ditetapkan oleh pihak kerajaan turut mengambil kira pandangan pihak pembangkang dalam berkongsi dalam menangani isu pengurusan pandemik COVID-19. Hal ini dibuktikan melalui penglibatan dan sesi libat urus pihak pembangkang di dalam Jawatankuasa Khas Bebas Darurat 2021 yang ditubuhkan mengikut

Seksyen 2 Ordinan Darurat (Kuasa-Kuasa Perlu) 2021 yang berperanan untuk menasihati Yang di-Pertuan Agong berkenaan pelaksanaan darurat.

2. Selain itu, Kerajaan Persekutuan sentiasa bekerjasama dengan Kerajaan-kerajaan Negeri untuk memastikan setiap tindakan dilaksanakan secara bersepadu. Dalam hubungan ini, semua Menteri Besar dan Ketua Menteri tanpa mengira latar belakang politik menjadi ahli kepada Sidang Khas Majlis Keselamatan Negara: Pengurusan COVID-19 yang dipengerusikan oleh YAB Perdana Menteri. Sidang tersebut berperanan membincangkan, meneliti dan memutuskan keperluan dasar berkaitan isu COVID-19 secara menyeluruh melibatkan semua kementerian dan agensi pelbagai sektor.

3. Di peringkat negeri, Menteri Besar dan Ketua Menteri bertanggungjawab mempengerusikan mesyuarat di peringkat negeri masing-masing melibatkan pelbagai jabatan dan agensi dalam menguruskan dan mengendalikan isu pandemik COVID-19 secara lebih berkesan. Sebagai contoh, keperluan untuk melibatkan pihak yang tidak disenaraikan sebagai ahli Jawatankuasa Pengurusan Bencana Daerah (JPBD) adalah terletak kepada kebijaksanaan dan budi bicara para Pegawai Daerah selaku Pengerusi JPBD. Senarai Jawatankuasa tersebut tidak *exhaustive* dan sesiapa yang berkaitan boleh dijemput mengikut ketetapan Pengerusi JPBD. Tiada halangan jua untuk mana-mana wakil rakyat baik di peringkat Parlimen atau Dewan Undangan Negeri untuk mengemukakan syor bertulis kepada JPBD.

4. Justeru, setiap peringkat pentadbiran kerajaan berperanan dan melaksanakan tanggungjawab bersama untuk memastikan kesejahteraan dan kelangsungan rakyat dan negara dapat dicapai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI SALAHUDDIN BIN
AYUB (PULAI)**

TARIKH : 06 OKTOBER 2021 (RABU)

SOALAN

**Datuk Seri Haji Salahuddin bin Ayub [Pulai] minta PERDANA
MENTERI menyatakan status terkini Rang Undang-undang Suruhanjaya
Perkhidmatan Parlimen.**

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Kerajaan tidak berhasrat mewujudkan Suruhanjaya Perkhidmatan Parlimen. Kerajaan seperti yang telah dipersetujui di dalam Memorandum Persefahaman Transformasi dan Kestabilan Politik (MoU) yang telah ditandatangani dengan pihak Pakatan Harapan pada 13 September yang lalu sedang mengkaji semula Akta Perkhidmatan Parlimen 1963 yang telah dimansuhkan pada tahun 1992.

Beberapa penambahbaikan akan dimasukkan di dalam draf RUU yang baru bagi memastikan semua pemegang taruh mendapat manfaat daripada undang-undang tersebut khususnya bagi pihak kakitangan parlimen. Tangga gaji, kemajuan kerjaya, serta kemudahan-kemudahan yang lain akan dikaji dengan teliti agar mereka mendapat faedah yang tidak kurang baiknya daripada yang sedang diterima mereka sekarang.

Oleh sebab RUU Perkhidmatan Parlimen ini akan melibatkan beberapa pindaan terhadap beberapa undang-undang yang lain termasuk pindaan Perlembagaan, maka masa yang lebih sedikit adalah perlu bagi mengkajinya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN FONG KUI LUN [BUKIT
BINTANG]**

TARIKH : 6 OKTOBER 2021 (RABU)

SOALAN

TUAN FONG KUI LUN [BUKIT BINTANG] minta **PERDANA MENTERI** menyatakan kedudukan kes-kes mahkamah berprofil tinggi dari segi bilangan, kes diselesaikan, tertangguh dan perjalanan kes sewaktu tempoh Kerajaan sementara berjalan.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, kedudukan kes-kes mahkamah berprofil tinggi sepanjang tempoh kerajaan sementara iaitu bermula 16 Ogos 2021 – 20 Ogos 2021 mengikut peringkat mahkamah adalah seperti berikut:

**SENARAI KES BERPROFIL TINGGI MENGIKUT PERINGKAT
MAHKAMAH DALAM TEMPOH KERAJAAN SEMENTARA
(16 OGOS 2021-20 OGOS 2021)**

MAHKAMAH	BILANGAN KES	SELESAI	TANGGUH	DIJALANKAN
Mahkamah Persekutuan	1	1		
Mahkamah Rayuan	2			2
Mahkamah Tinggi Malaya	4		2	2
Mahkamah Tinggi Sabah dan Sarawak	3		3	

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB TENGKU ZULPURI BIN RAJA PUJI
[RAUB]
TARIKH : 6 OKTOBER 2021 (RABU)

SOALAN

Minta **MENTERI SAINS, TEKNOLOGI DAN INOVASI** menyatakan tindakan proaktif dalam memaksimumkan proses bagi suntikan vaksin COVID-19 dalam fasa 3.

JAWAPAN

Tuan Yang di-Pertua,

Untuk makluman Ahli Yang Berhormat,

Pelaksanaan Program Imunisasi COVID-19 Kebangsaan atau PICK meliputi beberapa Fasa mengikut keutamaan kumpulan sasaran. Bagi pelaksanaan vaksinasi Fasa 3 sepertimana yang ditanya oleh Yang Berhormat, Fasa ini bermula pada Mei 2021 untuk populasi dewasa negara berumur 18 tahun ke atas termasuk bukan warganegara.

Sehingga 5 Oktober 2021, seramai 22.11 juta penduduk Malaysia telah berdaftar di sistem MySejahtera bagi mendapatkan vaksin. Ini merupakan 94.5% daripada sasaran kira-kira 23.4 juta populasi dewasa

atau berumur 18 tahun ke atas di dalam Malaysia. Berdasarkan kepada kemajuan pelaksanaan Program Imunisasi COVID-19 Kebangsaan (PICK), seramai 88.4% penduduk dewasa telah lengkap divaksinasi.

Bagi memaksimumkan proses bagi suntikan vaksin COVID-19 dalam Fasa 3, MOSTI melalui CITF memberi tumpuan pengagihan bekalan vaksin ke negeri-negeri yang mempunyai bilangan kes positif COVID-19 yang tinggi berdasarkan data semasa daripada Kementerian Kesihatan Malaysia (KKM).

Pada bulan September, agihan vaksin telah diberi keutamaan kepada 4 negeri iaitu Sabah, Kelantan, Kedah dan Johor. Hasilnya semua negeri telah mencapai sasaran 60% populasi dewasa divaksinasi pada bulan tersebut. Pencapaian vaksinasi negeri-negeri ini telah meningkatkan kadar vaksinasi keseluruhan negara melebihi 85% pada masa ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN AHMAD BIN HASSAN (PAPAR)

TARIKH : 6 OKTOBER 2021 (RABU)

SOALAN

YB TUAN AHMAD BIN HASSAN (PAPAR) minta **PERDANA MENTERI** menyatakan secara terperinci mekanisme pengesahan kematian bagi Bantuan Khas Pengurusan Kematian COVID-19 yang dikendalikan oleh Agensi Pengurusan Bencana Negara (NADMA), dan jaminan mekanisme tersebut terhadap keberkesanan penyaluran bantuan buat mereka yang layak.

JAWAPAN

**YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Di Pertua,

1. Agensi Pengurusan Bencana Negara, Jabatan Perdana Menteri (NADMA, JPM) hanya menerima pakai pengesahan kematian berkaitan COVID-19 daripada Kementerian Kesihatan Malaysia (KKM) Putrajaya sahaja sebagai semakan, verifikasi tunggal dan pengesahan sebelum sebarang kelulusan Bantuan Khas Pengurusan Kematian COVID-19 diberikan kepada permohonan pertama yang lengkap diterima.
2. Pemohon (waris) perlu mengemukakan lima dokumen iaitu borang permohonan yang disahkan oleh hospital yang memaklumkan kematian berkaitan COVID-19, salinan sijil kematian, salinan kad pengenalan si

mati, salinan kad pengenalan waris, dan salinan penyata bank waris. Pengecualian pengesahan hospital diberikan secara automatik bagi pemohon yang tidak dapat memperolehi pengesahan hospital kerana verifikasi pegesahan kematian berkaitan COVID-19 adalah daripada KKM Putrajaya. NADMA juga menerima pakai apa sahaja dokumen kematian seperti permit pengebumian kerana memahami kesukaran mendapatkan Sijil Kematian akibat operasi Jabatan Pendaftaran Negara yang terhad sewaktu PKP.

3. Pemohon boleh menghantar permohonan yang lengkap melalui pos / emel bkcovid19@nadma.gov.my atau Whatsapp ke nombor 011-13218056. NADMA akan menyemak kelayakan, memastikan bukan permohonan berulang serta membuat semakan dan verifikasi kematian berkaitan COVID-19 dengan KKM Putrajaya.

4. NADMA, memproses permohonan, memuatnaik status TERIMA di portal semakan laman sesawang NADMA, membuat perakuan, menyediakan baucar bayaran dan memuatnaik status LULUS di portal semakan di laman sesawang NADMA. Bayaran bantuan akan dibuat secara pemindahan elektronik ke akaun pemohon. Keseluruhan proses akan mengambil masa 30 hari bekerja tertakluk kepada semakan, verifikasi dan pengesahan data kematian COVID-19.

5. Dengan bilangan Sekretariat Bantuan Khas COVID-19 yang sedia ada serta bilangan peningkatan permohonan, setakat ini proses tersebut didapati masih teratur dan terkawal. Sekiranya terdapat keperluan untuk mempercepatkan bayaran, kelulusan khas dan prosedur kewangan dan pembayaran perlu dilihat semula bagi memenuhi ekspektasi pelanggan. Penanda arasan dengan sistem bantuan mySalam juga dapat memberikan gambaran perbandingan bagi tujuan ini.

Sekian, terima kasih.

**PEMBERITAHUAN PERTANYAAN
MESYUARAT PERTAMA, PENGGAL KEEMPAT,
PARLIMEN KEEMPAT BELAS,
DEWAN RAKYAT**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 6 OKTOBER 2021 (RABU)

SOALAN

TUAN WONG LING BIU [SARIKEI] minta **PERDANA MENTERI** menyatakan berapa jumlah penjawat awam bekerja dari rumah dalam fasa yang berbeza pada pandemik COVID-19 ini.

JAWAPAN

YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)

Tuan Yang di-Pertua,

Dalam usaha Kerajaan untuk meminimumkan risiko jangkitan COVID-19 serta mengoptimumkan tahap penyampaian perkhidmatan, Kerajaan telah menggariskan kadar kehadiran ke pejabat dan Bekerja Dari Rumah (BDR) mengikut fasa berbeza melalui media semasa pelancaran Pelan Pemulihan Negara (PPN) seperti berikut:

Fasa	Bekerja Dari Rumah (%)	Kehadiran Ke Pejabat (%)
1	60	40
2	40	60
3	20	80
4	0	100

Sebagai maklumat, peratusan kehadiran bertugas di pejabat mengikut fasa-fasa peralihan PPN ini tidak termasuk *frontliners*, serta penjawat awam yang bertugas di sektor keselamatan, pertahanan dan penguatkuasaan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB DATO' WIRA HAJI MOHD. ANUAR BIN
MOHD. TAHIR (TEMERLOH)**

TARIKH : 06 OKTOBER 2021 (RABU)

SOALAN

DATO' WIRA HAJI MOHD. ANUAR BIN MOHD. TAHIR [TEMERLOH] minta **MENTERI KERJA RAYA** menyatakan langkah yang telah diambil bagi menangani kos bahan binaan yang telah meningkat tinggi akibat 'Perintah Kawalan Pergerakan' di mana banyak projek pembinaan tergendala dan kontraktor-kontraktor kecil tidak berupaya menyiapkan projek-projek mereka.

JAWAPAN

Tuan Yang Di-Pertua,

Untuk makluman Ahli Yang Berhormat, bagi menangani isu kenaikan kos bahan binaan dalam tempoh Perintah Kawalan Pergerakan (PKP), Kementerian Kerja Raya (KKR) melalui Jabatan Kerja Raya (JKR) dan Lembaga Pembangunan Industri Pembinaan (CIDB) Malaysia serta agensi pelaksana berkaitan telah mengadakan beberapa sesi libat urus bersama pemain industri untuk memperhalusi perkara tersebut. Hasil daripada sesi libat urus bersama industri, KKR telah mengemukakan cadangan untuk mewujudkan semula peruntukan pengiraan klausa perubahan harga (*Variation of Price*, VOP) kepada Kementerian Kewangan Malaysia (MoF).

Justeru itu, MoF telah menguatkuasakan Pekeliling Baharu PK2.4 Pelaksanaan Syarat Perubahan Harga (*Variation of Price* – VOP) di dalam kontrak kerja pada 15 Julai 2021. Pekeliling ini berkuatkuasa mulai 1 Januari 2021 sehingga 31 Disember 2021 meliputi kerja bangunan, kejuruteraan awam dan mekanikal & elektrik (M&E). Antara bahan binaan yang diberi kemudahan VOP adalah seperti berikut:

(a) Kerja bangunan dan kejuruteraan awam:

1. *Mild Steel Round Bars*
2. *High Tensile Deformed Bars*
3. *Crusher Run*
4. *Water Pipe and Sewerage Pipe*

(b) Kerja M&E:

1. *Copper Cables*
2. *Switchgears*
3. *Transformers*
4. *Generators*
5. *Lightning Protection System and Earthing System*
6. *Air Conditioning System*

7. Motor (Pumpset)

Untuk makluman Ahli Yang Berhormat jua, KKR melalui CIDB Malaysia telah melaksanakan pemantauan harga bulanan dan menerbitkannya melalui Portal *National Construction Cost Centre* (N3C) (www.n3c.cidb.gov.my). Harga bahan binaan ini dikumpulkan melalui kerjasama dengan beberapa persatuan berkaitan pembinaan dan diperolehi daripada kontraktor.

Kenaikan kos antaranya adalah disebabkan penutupan kilang dalam tempoh PKP, yang mana telah menjejaskan operasi kilang khususnya yang mengeluarkan bahan binaan yang seterusnya memberi impak kepada pelaksanaan projek. Walau bagaimanapun, melalui Pelan Pemulihan Negara (PPN), dengan pembukaan sektor ekonomi secara berfasa yang antaranya akan membenarkan operasi kilang, KKR menjangkakan pengeluaran bahan binaan tersebut dapat menstabilkan semula harga bahan binaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB DATUK DR. HASAN BIN BAHROM
[TAMPIN]**

TARIKH : 6 OKTOBER 2021 (RABU)

SOALAN

Minta **MENTERI SAINS, TEKNOLOGI DAN INOVASI** menyatakan tahap peratusan vaksinasi masyarakat luar bandar. Apakah ada dalam kalangan masyarakat bandar atau luar bandar antivaksin dan bagaimana Kerajaan menyelesaikan masalah tersebut.

JAWAPAN

Tuan Yang di-Pertua,

Untuk makluman Ahli Yang Berhormat,

Program Imunisasi COVID-19 Kebangsaan (PICK) kini (5 Oktober 2021) telah mencapai kadar populasi dewasa lengkap divaksinasi sebanyak 88.4%. Melihat kepada pencapaian ini, CITF optimis usaha PICK sedang berjalan mengikut landasan dan perancangan ditetapkan.

Bagi peratusan vaksinasi masyarakat luar bandar, MOSTI menerusi CITF tidak mempunyai data menyeluruh terhadap kategori masyarakat yang dimaksudkan. Buat masa ini, data CITF meliputi kategori penduduk dewasa berumur 18 tahun ke atas, OKU, komorbid dan mengikut daerah di setiap negeri.

Bagi persoalan masyarakat bandar atau luar bandar yang antivaksin, MOSTI juga tidak mempunyai data khusus mengenai perkara

ini. Walau bagaimanapun, pendirian terkini Kerajaan berhubung isu antivaksin ini adalah seperti berikut iaitu:

Kerajaan akan meneruskan usaha advokasi dan memberi penerangan mengenai kepentingan pengambilan vaksin COVID-19 kepada masyarakat, di samping menambah baik pelaksanaan Program Imunisasi COVID-19 Kebangsaan bagi menggalakkan penerimaan vaksin COVID-19 oleh masyarakat di setiap pelusuk negara ini.

Kerajaan turut meneliti beberapa alternatif lain untuk meningkatkan penerimaan vaksin COVID-19, iaitu:

- i. Pilihan 'Opt Out' untuk tidak mengambil vaksin bagi individu yang tidak mahu mengambil vaksin dan bersetuju untuk tidak menikmati kemudahan-kemudahan yang diberikan kepada penerima vaksin COVID-19 lengkap;
- ii. Mewajibkan individu lengkap pengambilan vaksin COVID-19 sebagai syarat untuk melakukan aktiviti tertentu seperti memasuki fasiliti awam (seperti institusi pendidikan, perpustakaan dan sebagainya) dan aktiviti sosial (seperti bersukan dan beriadah);
- iii. Cadangan mewajibkan pengambilan vaksin dalam sektor tertentu sahaja seperti sektor kesihatan, sektor keselamatan, sektor pendidikan dan sektor perkhidmatan melalui peruntukan Akta Keselamatan dan Kesihatan Pekerjaan 1994 [Akta 514].

Langkah mewajibkan suntikan vaksin COVID-19 ke atas seluruh rakyat Malaysia merupakan cadangan inisiatif terakhir yang hanya akan dilaksanakan sekiranya perlu bagi mencapai liputan imunisasi yang optimum.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN BARU BIAN (SELANGAU)

TARIKH : 06 OKTOBER 2021 (RABU)

SOALAN

TUAN BARU BIAN [SELANGAU] minta **MENTERI KERJA RAYA** menyatakan bagaimanakah laluan jajaran terbaru Sarawak Sabah Link Road (Fasa 1). Adakah Surat Tawaran telah diberi kepada kontraktor dan bila dijangka tarikh siap projek tersebut.

JAWAPAN

Tuan Yang Di-Pertua,

Untuk makluman Ahli Yang Berhormat, projek *Sarawak-Sabah Link Road (SSLR)* Fasa 1 telah diawad untuk tujuan pelaksanaan pada 16 Julai 2021 dengan harga kontrak semasa sebanyak RM1.13 bilion. Skop projek ini melibatkan pembinaan kombinasi jajaran jalan baharu dan sedia ada sepanjang 77 kilometer dari Bandar Lawas ke Persimpangan Long Lopeng. Berdasarkan kontrak, projek ini akan mengambil masa selama 53 bulan untuk disiapkan, iaitu jangkaan siap projek adalah pada Januari 2026.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI (ALOR SETAR)

TARIKH : 6 OKTOBER 2021 (RABU)

SOALAN

TUAN CHAN MING KAI (ALOR SETAR) minta **PERDANA MENTERI** menyatakan apakah cadangan pindaan bagi arahan MKN No 23 serta apakah pertimbangan yang menyebabkan cadangan tersebut masih tidak dapat dimuktamadkan.

JAWAPAN

YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)

Tuan Yang di-Pertua,

1. Arahan Majlis Keselamatan Negara No. 23: Mekanisme Pengurusan PATI Pemegang Kad UNHCR (2009) merupakan satu-satunya mekanisme pengurusan pelarian di dalam negara.
2. Pada ketika ini, Majlis Keselamatan Negara, Jabatan Perdana Menteri (MKN, JPM) dengan kerjasama Kementerian dan Agensi yang berkaitan sedang melaksanakan semakan semula ke atas Arahan MKN No. 23 tersebut. Penambahbaikan ini juga turut mengambil kira input dan pandangan daripada pelbagai pihak dan pemegang taruh agar suatu dasar dan mekanisme yang lebih efisien dapat diwujudkan, disamping menjamin keselamatan dan kedaulatan negara.

3. Antara cadangan-cadangan penambahbaikan yang telah dirangka adalah membabitkan penetapan keahlian Jawatankuasa-Jawatankuasa, penyelarasan perundangan, koordinasi gerak kerja pendaftaran dan dokumentasi serta pembentukan mekanisme bagi isu-isu membabitkan kebajikan, sokongan dan kehidupan bagi tempoh sepanjang keberadaan sementara mereka di dalam negara sebelum pulang semula secara sukarela ke negara asal atau ditempatkan ke negara ke tiga.

4. Selain itu, bagi memastikan dasar ini adalah selari dengan hasrat kepimpinan baru, MKN, JPM akan melaksanakan penyelarasan dan akan mengemukakan cadangan penambahbaikan ini kepada Kerajaan dalam masa terdekat. Selain penambahbaikan arahan di atas, MKN, JPM juga sedang dalam proses mengemaskini dan melaksanakan penjajaran semula semua Arahan-Arahan Majlis Keselamatan Negara sedia ada agar lebih tersusun dan relevan.

Sekian, terima kasih.

PERTANYAAN BAGI JAWAPAN LISAN
MESYUARAT PERTAMA, PENGGAL KEEMPAT, PARLIMEN KE-14
DEWAN RAKYAT

PERTANYAAN : LISAN

**DARIPADA : DATUK SERI PANGLIMA MADIUS
TANGAU [TUARAN]**

TARIKH : 6 OKTOBER 2021 (RABU)

SOALAN

DATUK SERI PANGLIMA MADIUS TANGAU [TUARAN] minta **PERDANA MENTERI** menyatakan apakah pencapaian Bahagian Sabah dan Sarawak di Jabatan Perdana Menteri dalam usaha untuk melaksanakan MA63 dan desentralisasi kuasa Persekutuan kepada negeri-negeri.

JAWAPAN: YB DATUK SERI PANGLIMA DR. MAXIMUS JOHNITY
ONGKILI MENTERI DI JABATAN PERDANA MENTERI
(HAL EHWAL SABAH DAN SARAWAK)

Tuan Yang di-Pertua,

Untuk makluman Ahli-Ahli Yang Berhormat, Jawatankuasa Khas Kabinet Untuk Menyemak Pelaksanaan Perjanjian Malaysia 1963 (JKKKMA63) yang ditubuhkan oleh Kerajaan sebelum ini pada 2018-2019, telah pun dibubarkan oleh 2 Kerajaan Pakatan Harapan pada 15 Januari 2020. JK Kabinet terdahulu (JKKKMA63) hanyalah persetujuan dasar untuk menyelesaikan tuntutan MA63 yang masih memerlukan tindakan lanjut melibatkan perubahan dasar, pindaan undang-undang sama ada peringkat persekutuan atau peringkat negeri serta melibatkan juga pelbagai Kementerian untuk dilaksanakan.

Melalui Majlis Khas Perjanjian Malaysia 1963 (Majlis Khas MA63) yang telah ditubuhkan pada 9 September 2020, hak-hak yang dituntut

oleh Sabah dan Sarawak terus diteliti dan diperhalusi secara bersama antara Kerajaan Persekutuan, Kerajaan Negeri Sabah dan Kerajaan Negeri Sarawak. Sehingga kini, Majlis Khas telah bermesyuarat sebanyak 2 kali iaitu pada 2 Disember 2020 dan 13 April 2021 dan akan bermesyuarat semula pada Oktober ini iaitu sebaik sahaja Mesyuarat Pertama Penggal Ke-4, Parlimen Ke-14 ini selesai bersidang.

Untuk makluman Ahli Yang Berhormat, dalam memperhalusi tuntutan-tuntutan dan hak-hak Sabah dan Sarawak ini, empat (4) Jawatankuasa Kerja telah ditubuhkan di bawah Majlis Khas MA63 iaitu:

- i. Jawatankuasa Kerja Rakan Sekutu (JKRS)**
Membincangkan cadangan Pindaan Perkara 1(2) dan Perkara 160(2) mengenai tafsiran “Persekutuan”, Pelembagaan Persekutuan;
- ii. Jawatankuasa Kerja Keselamatan Negeri Sabah dan Sarawak (JKSS)**
Membincangkan perkara berkaitan keselamatan negeri seperti isu sempadan negeri Sarawak, isu imigresen seperti IMM13, Burung-Burung, Kad Banci dan PATI di negeri Sabah;
- iii. Jawatankuasa Kerja Sosio Ekonomi (JKSE)**
Keperluan infrastruktur asas di negeri Sabah dan Sarawak seperti jalan raya, air/elektrik, kesihatan, pendidikan, digital, kemiskinan dan perumahan rakyat termiskin; dan
- iv. Jawatankuasa Perundingan Bersama Mengenai Pemberian Khas di bawah Perkara 112D Perlembagaan Persekutuan (JCC)**
Iaitu berkenaan semakan semula Pemberian Khas di bawah Perkara 112D Perlembagaan Persekutuan.

Untuk makluman Ahli Yang Berhormat, berkenaan cadangan pindaan Perlembagaan Persekutuan, ianya sedang dibincangkan dengan lebih terperinci dan menyeluruh. Bagi tujuan tersebut, YBhg. Tan Sri Peguam Negara telah diberikan tanggungjawab untuk memperhalusi

4 dan meneliti cadangan pindaan Perkara 1(2) Perlembagaan Persekutuan tersebut secara bersama dengan YBhg. Peguam Besar Negeri Sabah dan YBhg. Peguam Besar Negeri Sarawak.

Cadangan pindaan kepada Perlembagaan Persekutuan dibincangkan terlebih dahulu di peringkat Jawatankuasa Kerja Rakan Sekutu sebelum ia dibentangkan ke Majlis Khas MA63 bagi mendapatkan persetujuan bersama di antara Kerajaan Persekutuan bersama dengan Kerajaan Negeri Sabah dan Kerajaan Negeri Sarawak. Selepas itu, barulah cadangan pindaan tersebut akan dibentangkan ke Dewan Yang Mulia ini untuk dibahaskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGKAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB PUAN MARIA CHIN BINTI ABDULLAH
[PETALING JAYA]**

TARIKH : 6 OKTOBER 2021 (RABU)

SOALAN

Minta **MENTERI SAINS, TEKNOLOGI DAN INOVASI** menyatakan penjelasan tentang 'Kapasiti Lonjakan Operasi' di Lembah Klang, mengapa masih ada masalah tentang sistem pendaftaran untuk vaksinasi seperti warga emas tidak boleh 'walk-in'; data terhilang; sudah daftar tetapi masih tidak ada temu janji; walaupun RM70 juta telah diperuntukkan untuk integrasi data vaksin COVID-19 untuk sistem temu janji dan apakah tindakan-tindakan yang tepat dan efisien telah/akan digunakan untuk melicinkan proses.

JAWAPAN

Tuan Yang di-Pertua,

Untuk makluman Ahli Yang Berhormat,

Sejak bulan Julai yang lalu, Kerajaan melaksanakan Operasi Lonjakan Kapasiti atau *Operation Surge Capacity* di Lembah Klang bagi mempercepatkan proses vaksinasi terutamanya ke atas populasi di Wilayah Persekutuan Kuala Lumpur dan Selangor.

Atas usaha CITF dan KKM melalui *Greater Klang Valley Special TaskForce* dan CITF, jumlah penerima vaksin lengkap di Lembah Klang telah mencapai 111.8% manakala penerima dos pertama sahaja telah pun mencecah 115.5% pada 5 Oktober 2021.

Sistem MySejahtera merupakan aplikasi yang dibangunkan oleh Kerajaan Malaysia untuk membantu dalam pengawasan penularan wabak COVID-19 di dalam negara dengan membolehkan pengguna melaksanakan penilaian kesihatan sendiri.

Penambahbaikan pada sistem tersebut turut mengambil kira integrasi sistem Farmasi sedia ada di bawah KKM dengan MySejahtera melalui MyVas, pelaksanaan integrasi sistem *dashboard*, modul pendaftaran vaksinasi MySejahtera dan penjana siji vaksinasi melalui MySejahtera.

Untuk makluman Yang Berhormat, jumlah peruntukan keseluruhan yang disalurkan kepada MOSTI bagi tujuan yang dimaksudkan ialah RM65.7 juta.

Pecahan perbelanjaan adalah meliputi pelbagai perkara seperti integrasi data dan janji temu termasuk menaik taraf sistem MySejahtera.

Bagi penambahbaikan kepada sistem MySejahtera yang melibatkan integrasi data dan sistem janji temu, perkara yang terlibat adalah seperti di bawah:

- i. Penambahan Perkakasan bagi Peningkatan Sistem Pengurusan Vaksin (VMS) Berasaskan Teknologi *Blockchain*;
- ii. Pendaftaran vaksinasi MySejahtera (*Google Map and Places Application Programming Interface [API]*);
- iii. Chatbot *Knowledge Driven Syntactic Parsing Intelligence* (KRISPI) dan perkhidmatan *live chat*;
- iv. Perolehan *load balancer* bagi pangkalan data ketiga PICK;
- v. *Sistem Dashboard Bersepadu COVID-19*; dan
- vi. *Penjana Digital Passport MySejahtera*;

NO. SOALAN : 43

Seterusnya, bagi memastikan kelancaran PICK, Kerajaan turut memberi tumpuan kepada perkara-perkara seperti di bawah:

- i. Pusat Panggilan (*hotline centre and chatbot*);
- ii. Penyelenggaraan sistem sukarelawan MyVAC;
- iii. Kajian terhadap *genomic surveillance* dan *immunisation surveillance*; dan
- iv. Perkhidmatan sokongan teknikal dan jaminan kualiti Program Imunisasi COVID-19 Kebangsaan.

Untuk makluman Yang Berhormat, peruntukan RM65.7 juta ini adalah peruntukan siling. Oleh yang demikian, ia juga tidak semestinya dibelanjakan sepenuhnya oleh Kerajaan bagi tujuan pelaksanaan PICK.

Walaupun, jumlah perbelanjaan semasa adalah RM18.8 juta (setakat 30 September 2021).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 06 OKTOBER 2021 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **PERDANA MENTERI** menyatakan jumlah individu yang telah didakwa di mahkamah kerana menghina YAB Menteri Besar Kedah, dan apakah pendirian Kerajaan terhadap isu kritikan pemimpin dalam sebuah demokrasi seperti yang diamalkan di Malaysia.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, sehingga kini, Jabatan Peguam Negara tidak pernah dirujuk dengan apa-apa kertas siasatan yang melibatkan individu yang didakwa menghina YAB Menteri Besar Kedah. Oleh itu, tiada pendakwaan dibuat terhadap mana-mana pihak berhubung dengan perkara tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB PUAN YEO BEE YIN [BAKRI]

TARIKH : 6 OKTOBER 2021 (RABU)

SOALAN

Minta **MENTERI SAINS, TEKNOLOGI DAN INOVASI** menyatakan apakah kos purata pemberian setiap dos vaksin dan nisbah staf ke kapasiti untuk Pusat Pemberian Vaksin (PPV) yang berbeza – Mega PPV, PPV yang menggunakan fasiliti awam, klinik-klinik swasta dan PPV bergerak.

JAWAPAN

Tuan Yang di-Pertua,

Untuk makluman Ahli Yang Berhormat,

MOSTI melalui CITF melaksanakan pemberian vaksin di negeri-negeri dengan kerjasama pelbagai agensi persekutuan di peringkat negeri bersama Kerajaan Negeri.

- Bagi PPV Awam, kos suntikan adalah percuma dan ditanggung Kerajaan. Walau bagaimanapun terdapat kos pengurusan PPV Awam dengan purata RM10 bagi setiap dos bertujuan untuk menanggung kos pengendalian vaksinasi dan peralatan pakai buang di PPV tersebut.
- Bagi PPV Mega, anggaran kos tidak melebihi RM15/seorang meliputi kos sewaan, utiliti, perkakasan untuk pengoperasian PPV, bahan pakai habis, perkhidmatan pembersihan dan sanitasi serta makan minum Petugas. Selain itu, PPV Mega juga melibatkan kos vaksinasi yang dibayar kepada Pengamal Perubatan Swasta

(PPS) iaitu RM14 bagi setiap dos. Ini mengambil kira pelbagai kos tambahan yang perlu ditanggung oleh syarikat pengamal perubatan swasta (*Healthcare Organiser* - HCO) di PPV Mega seperti pembelian *cold box*, *fridge*, *freezer*, pembayaran *locum* kepada doktor dan jururawat, kos pengangkutan, *resus trolley*, perkhidmatan ambulan/kecemasan dan apa jua peralatan yang tidak dibekalkan oleh KKM.

- Seterusnya bagi PPV Hospital Swasta dan PPV klinik GP, kos vaksinasi yang ditanggung oleh Kerajaan adalah sebanyak RM14 dan dibayar melalui anak syarikat Kerajaan iaitu Protect Health Corporation Sdn. Bhd.
- Bagi PPV Bergerak melalui inisiatif MOVAK yang dikendalikan oleh Kementerian Perpaduan (KPN) dan Kementerian Perumahan dan Kerajaan Tempatan (KPKT), terdapat kos sampingan yang terlibat seperti pengangkutan, bahan petrol dan lain-lain kos. Kos ini dinyatakan ini ditanggung oleh Kementerian berkaitan.

Bagi menjawab pertanyaan nisbah staf mengikut PPV, CITF menganggarkan jumlah staf bertugas berdasarkan kepada kapasiti bilangan penerima vaksin harian.

- Sebagai contoh, Pusat Pemberian Vaksin (PPV) Mega dengan kapasiti 3,000 dos/sehari perlu mempunyai petugas kesihatan sekurang-kurangnya 30 orang. Bagi petugas bukan kesihatan, jumlah staf dianggarkan seramai 65 orang yang terdiri daripada sukarelawan MyVac dan petugas keselamatan yang terdiri daripada Jabatan Sukarelawan Malaysia (RELA) dan Angkatan Pertahanan Awam (APM).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB DATUK LIEW CHIN JIN @ CHRISTINA
LIEW [TAWAU]**

TARIKH : 6 OKTOBER 2021 (RABU)

SOALAN

Minta **MENTERI SAINS, TEKNOLOGI DAN INOVASI** menyatakan berapa jumlah daripada 29 buah pusat vaksinasi baru itu yang sudah atau akan ditubuhkan di Sabah. Saya mengambil kesempatan ini untuk mengulangi gesaan kepada Kerajaan Persekutuan supaya mempertimbangkan keperluan menubuhkan satu pusat vaksinasi baru di kawasan Dewan Undangan Negeri (DUN) Apas. Buat masa ini, kawasan Parlimen 190 Tawau merangkumi tiga kawasan DUN iaitu Sri Tanjung, Balung dan Apas tetapi ia hanya mempunyai dua buah pusat vaksinasi - satu di Sri Tanjung dan satu lagi di Balung.

JAWAPAN

Tuan Yang di-Pertua,
Untuk makluman Ahli Yang Berhormat,

Sehingga 4 Oktober 2021, pelaksanaan vaksinasi di daerah Tawau, Sabah mencapai 66.2% populasi dewasa menerima sekurang-kurangnya 1 dos vaksin manakala 53.3% populasi dewasa telah lengkap dos.

Jumlah PPV yang aktif di Sabah adalah sebanyak 46 PPV Awam dan 12 PPV Integrasi.

Bagi daerah Tawau, terdapat satu PPV Awam iaitu:

- Dewan Persatuan Bola Keranjang dengan kapasiti 3,500 dos sehari;

Manakala terdapat 3 PPV Integrasi di lokasi seperti berikut:

- Dewan Masyarakat Tawau dengan kapasiti 3,000 dos sehari;
- Dewan IPG Balung dengan kapasiti 1,500 dos sehari; dan
- Dewan Terbuka SK Merotai Besar dengan kapasiti 1,000 dos sehari.

Jumlah kapasiti harian PPV di daerah Tawau adalah sebanyak 9,000 dos sehari. Oleh yang demikian, kapasiti ini adalah mencukupi dan setakat ini, CITF Negeri belum bercadang untuk menambah PPV di kawasan DUN Apas sepertimana yang dimaksudkan oleh Yang Berhormat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM LIP ENG [KEPONG]

TARIKH : 6 OKTOBER 2021 (RABU)

SOALAN

TUAN LIM LIP ENG [KEPONG] minta **PERDANA MENTERI** menyatakan jumlah gaji, gratuiti dan pencen bulanan yang layak diterima oleh para Duta Khas Perdana Menteri masing-masing selepas tamatnya tempoh Perdana Menteri yang Ke-8. Nyatakan tugas-tugas secara teliti yang telah dilakukan mereka.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, 3 Duta Khas kepada YAB Perdana Menteri bertaraf Menteri tersebut dilantik bertujuan bagi membantu dan menasihati YAB Perdana Menteri dalam hal-hal yang berkaitan dengan negara atau rantau mereka ditugaskan. Seperti mana sedia maklum, 3 Duta Khas tersebut ialah YB Marang sebagai Duta Khas ke rantau Timur Tengah, YB Bintulu sebagai Duta Khas ke Republik Rakyat China dan YB Serian sebagai Duta Khas ke Asia Timur.

Kesemua Duta Khas kepada YAB Perdana Menteri ini diberi tugas dan tanggungjawab untuk meningkatkan hubungan dua-hala antara Malaysia dengan negara dari rantau mereka ditempatkan atau ditugaskan – ia meliputi antaranya peningkatan dalam hubungan luar, ekonomi, perdagangan, pelaburan serta pendidikan. Bagi rantau Timur Tengah pula, ia termasuk peningkatan kerjasama dalam bidang agama Islam. Taraf Menteri yang diberikan juga adalah secara pentadbiran dan tidak sama dengan taraf Menteri seperti diperuntukkan di bawah Perkara 43(2)(b) Perlembagaan Persekutuan.

Untuk makluman Yang Berhormat, selepas tamatnya tempoh Perdana Menteri Ke-8, Duta-Duta Khas tersebut tidak menerima sebarang pembayaran gratuiti dan pencen bulanan apabila tamat perkhidmatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS (2021)**

PERTANYAAN : JAWAB LISAN

**DARIPADA : YB PUAN HAJAH FUZIAH BINTI SALLEH
[KUANTAN]**

TARIKH : 6 OKTOBER 2021 [RABU]

SOALAN

Minta PERDANA MENTERI menyatakan bila undang-undang wakaf akan dibentangkan seperti yang dijanjikan memandangkan jawapan sebelum ini disebut akan dibentangkan pada tahun 2020.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI (HAL EHWAL AGAMA)**

Tuan Yang Di Pertua,

1. Rang Undang-Undang Wakaf (Wilayah-Wilayah Persekutuan) ("RUU Wakaf") masih dalam tindakan aktif JAKIM. Untuk makluman Ahli Yang Berhormat, Kerajaan sebelum ini telah menggubal RUU Wakaf. Dalam hal ini, cadangan penggubalan RUU tersebut telah diedarkan kepada agensi-agensi yang berkaitan seperti Kementerian Kewangan dan Jabatan Peguam Negara untuk mendapatkan ulasan.
2. Walau bagaimanapun, penggubalan RUU Wakaf ini tidak dapat dimuktamadkan pada masa ini memandangkan terdapat beberapa isu dasar yang dibangkitkan oleh Kementerian Kewangan yang perlu diselesaikan dengan agensi yang terlibat.
3. Antara perkara dasar yang dibangkitkan oleh Kementerian Kewangan ialah, antara lain, pertama, struktur organisasi semasa Majlis Agama Islam Persekutuan (MAIWP) dan Kumpulan (subsidiari dan yayasan) berserta peranan yang dijalankan dalam melaksanakan pengurusan wakaf serta implikasi/perubahan kepada struktur dan peranan MAIWP dan Kumpulan selepas penubuhan Perbadanan Wakaf Majlis Agama Islam Persekutuan (Perbadanan Wakaf MAIWP) dan Rang Undang-Undang Wakaf (Wilayah-Wilayah Persekutuan) 2020 (RUU Wakaf 2020) ; kedua, cadangan model perniagaan (business plan) dan unjuran kewangan untuk tempoh 10 tahun berserta asas yang digunakan (assumption); dan ketiga, kelangsungan Perbadanan Wakaf MAIWP khususnya dari segi kemampuan kewangan di masa hadapan (self-financing).
4. Tindakan selanjutnya berhubung dengan RUU Wakaf tersebut akan diambil oleh Kerajaan setelah isu dasar tersebut diselesaikan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHD AZIS BIN JAMMAN
[SEPANGGAR]**

TARIKH : 6 OKTOBER 2021 (RABU)

SOALAN:

Minta **PERDANA MENTERI** menyatakan status terkini tuntutan Sabah ke atas Petronas berhubung rundingan penyelesaian isu Cukai Jualan Negeri (CJN) bagi produk petroleum dan kuasa pengawalselian ke atas sumber minyak dan gas, dan setakat ini, berapa jumlah yang telah dibayar oleh Petronas kepada Sabah.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, Kerajaan Negeri Sabah telah mengenakan cukai jualan ke atas produk petroleum kepada PETRONAS sejak tahun 2020. Sehingga Julai 2021, pihak PETRONAS telah membayar cukai jualan ke atas produk petroleum berjumlah RM799.5 juta kepada pihak Kerajaan Negeri Sabah.
2. Seperti Ahli Yang Berhormat sedia maklum, Kerajaan Persekutuan secara prinsip telah bersetuju mengenai penyerahan kuasa kawal selia industri bekalan gas kepada Kerajaan Negeri Sabah tertakluk kepada persetujuan bersama mengenai had jumlah subsidi harga gas asli bagi sektor elektrik di negeri Sabah yang perlu ditanggung oleh Kerajaan Persekutuan.
3. Rundingan di antara Kerajaan Persekutuan dan Kerajaan Negeri Sabah mengenai penyerahan kuasa kawal selia gas adalah tertumpu kepada kesediaan Kerajaan Negeri Sabah dalam mengambil alih kuasa kawal selia gas dan komitmen dalam mengurangkan subsidi harga gas asli bagi sektor elektrik secara berperingkat.
4. Persediaan Kerajaan Negeri Sabah dalam pengambil alihan kuasa kawal selia gas adalah penting bagi memastikan keselamatan operasi dan teknikal dalam pembekalan gas asli di Negeri Sabah. Dalam hal ini, perancangan pengambil alihan kuasa kawal selia gas dan tempoh masa yang diperlukan sedang diteliti dan dirundingkan di antara kedua-dua pihak.
5. Berdasarkan hasil perbincangan bersama Unit Perancang Ekonomi, Jabatan Perdana Menteri dengan wakil Kerajaan Negeri

Sabah pada 5 Ogos 2021, status persediaan dalam pengambilalihan kuasa kawal selia gas seperti berikut:

- i. Kerajaan Negeri Sabah telah menubuhkan Unit Tenaga sebagai persediaan penubuhan Suruhanjaya Tenaga Sabah. Unit ini akan bertanggungjawab dalam hal ehwal kawal selia tenaga;
- ii. Draf rang undang-undang berkaitan akan dibentangkan kepada Jemaah Menteri Negeri Sabah dan Dewan Undangan Negeri Sabah setelah dimuktamadkan oleh Unit Tenaga; dan
- iii. Setelah tempoh masa perancangan penyerahan kuasa kawal gas telah dipersetujui bersama oleh kedua-dua pihak. Kerajaan Negeri Sabah akan mendapatkan perintah penggantungan di bawah Perkara 95C daripada Jabatan Peguam Negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN ALICE LAU KIONG YIENG
(LANANG)**

TARIKH : 06 OKTOBER 2021 (RABU)

SOALAN

PUAN ALICE LAU KIONG YIENG [LANANG] minta **PERDANA MENTERI** menyatakan jumlah kes bunuh diri pada tahun 2019, 2020 dan 2021 (sehingga Ogos) dan apakah langkah yang telah dan akan diambil oleh Kerajaan untuk mengatasi masalah tersebut serta sama ada Kerajaan berhasrat untuk mengusulkan supaya kes bunuh diri tidak dianggap satu jenayah di bawah undang-undang tetapi merupakan satu penyakit.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, untuk statistik kes bunuh diri yang dilaporkan kepada pihak PDRM bagi tahun 2019, 2020 dan sehingga Julai 2021 adalah seperti berikut:

BIL	KONTINJEN	TAHUN			JUMLAH
		2019	2020	2021 (JAN-JUL)	
1	Johor	101	101	90	292
2	Kedah	35	16	36	87
3	Kelantan	18	30	4	52
4	Kuala Lumpur	82	60	72	214
5	Melaka	12	22	17	51
6	Negeri Sembilan	42	44	26	112
7	Pahang	35	37	23	95
8	Perak	42	56	72	170
9	Perlis	1	0	2	3
10	Pulau Pinang	63	65	65	193
11	Sabah	24	49	27	100
12	Sarawak	54	40	39	133
13	Selangor	90	96	156	342
14	Terengganu	10	15	9	34
JUMLAH		609	631	638	1878

Untuk makluman Ahli Yang Berhormat, Kerajaan melalui Jabatan Peguam Negara (AGC) telah mengambil inisiatif untuk mengkaji undang-undang berkenaan dengan kesalahan persubahatan dan percubaan membunuh diri di Malaysia kerana berdasarkan statistik setakat 2015 insiden percubaan membunuh diri semakin meningkat dan meliputi pelbagai peringkat umur. Isu percubaan membunuh diri menjadi lebih meruncing pada masa ini kerana keadaan ekonomi yang tidak menentu menjadikan ramai kehilangan sumber pendapatan atau hilang pekerjaan. Oleh yang demikian, pendekatan yang lebih holistik perlu diambil untuk mengekang perbuatan tersebut.

Berdasarkan hasil kajian perbandingan peruntukan undang-undang mengenai percubaan untuk membunuh diri di United Kingdom, New Zealand, India dan Singapura, didapati negara-negara tersebut telah mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan. Ini bermakna percubaan membunuh diri bukan lagi suatu kesalahan jenayah di negara-negara tersebut.

Oleh itu, berdasarkan perkembangan undang-undang berkaitan di negara yang dikaji, AGC sedang menimbang cadangan daripada pihak berkepentingan untuk mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan bagi mendapatkan rawatan yang sewajarnya.

AGC juga sedang meneliti dengan lebih lanjut pilihan perundangan yang ada serta implikasi perundangan sekiranya kesalahan percubaan membunuh diri dikeluarkan daripada sistem keadilan jenayah. Di samping itu, AGC sedang meneliti keperluan untuk meminda undang-undang lain yang berbangkit daripada pengeluaran kesalahan percubaan membunuh diri daripada sistem jenayah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SHAMSUL ISKANDAR @ YUSRE
BIN MOHD AKIN [HANG TUAH JAYA]**

TARIKH : 6 OKTOBER 2021 (RABU)

SOALAN

Minta **PERDANA MENTERI** menyatakan apakah pengukuran kemiskinan pelbagai dimensi yang baru telah diwujudkan memandangkan berikutan penguatkuasaan PKP ini wujud golongan “miskin baharu” atau golongan “miskin berbeza” dan apakah strategi Kerajaan untuk memastikan masalah kemiskinan ini dapat diatasi di mana bantuan yang sepatutnya dapat disalurkan kepada kumpulan sasar yang tepat.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat Hang Tuah Jaya, Indeks Kemiskinan Pelbagai Dimensi (MPI) adalah pengukuran kemiskinan dalam konteks yang lebih luas merangkumi beberapa dimensi bukan kewangan dan kewangan yang diperkenalkan dalam RMKe-11. MPI merangkumi empat dimensi iaitu kesihatan, pendidikan, taraf hidup dan pendapatan yang merangkumi 11 indikator. Berdasarkan Survei Pendapatan, Perbelanjaan Isi Rumah dan Kemudahan Asas (HIES & BA) 2019 indeks MPI nasional adalah semakin bertambah baik iaitu berkurang kepada 0.0110 mata (1.1%) pada tahun 2019 daripada 0.01523 mata (1.5%) pada 2016, hasil pencapaian yang lebih baik dalam dimensi pendapatan dan pendidikan.

2. Secara umumnya, daripada 11 indikator di bawah MPI, isi rumah telah menunjukkan peratusan ketersisihan yang semakin berkurangan dalam indikator jumlah tahun persekolahan, akses kepada perkhidmatan kesihatan, akses kepada bekalan air bersih, kepadatan bilik, akses kepada kemudahan kutipan sampah, akses kepada peralatan komunikasi asas dan pendapatan bulanan kasar berbanding pencapaian pada tahun 2016. Namun begitu, peratusan ketersisihan isi rumah didapati meningkat dalam indikator keadaan tempat kediaman, kemudahan pengangkutan manakala kemudahan tandas menunjukkan peratusan ketersisihan amat minimum, walaupun sedikit lebih tinggi dari tahun 2016.

3. Untuk makluman Ahli Yang Berhormat, kaedah mengukur kemiskinan akan terus ditambah baik dalam memastikan keberkesanan inisiatif pembasmian kemiskinan. Dimensi dan indikator MPI akan diperluas agar lebih komprehensif untuk mengukur kemiskinan pelbagai dimensi dengan lebih baik. MPI akan membantu proses membuat keputusan berasaskan bukti pada semua peringkat perancangan, pelaksanaan, pemantauan dan penilaian inisiatif untuk mengurangkan kemiskinan. MPI akan diguna pakai oleh semua pihak berkepentingan

dalam merangka program yang mengambil kira ketersisihan dan keperluan isi rumah bagi pelaksanaan yang lebih bersasar dan berkesan.

4. Berdasarkan Laporan Anggaran Pendapatan Isi Rumah dan Insiden Kemiskinan oleh Jabatan Perangkaan Malaysia (DOSM) pada Ogos 2021, pendapatan purata kasar bulanan isi rumah telah menurun sebanyak 10.3% daripada RM7,901 pada tahun 2019 kepada RM7,089 pada tahun 2020. Manakala, insiden kemiskinan mutlak telah meningkat kepada 8.4% daripada 5.6% pada tempoh yang sama. Isi rumah yang dikategorikan sebagai M40 berdasarkan HIES & BA 2019 juga mengalami penurunan pendapatan di bawah had pendapatan B40 tahun 2020. Berdasarkan laporan yang sama, sebanyak 20.0% atau kira-kira 600,000 isi rumah daripada kumpulan isi rumah M40 yang berpendapatan di antara RM4,850 dan RM10,959 telah beralih kepada had pendapatan di bawah kumpulan B40.

5. Rancangan Malaysia Kedua Belas (RMKe-12) akan menangani kemiskinan dan ketidaksetaraan daripada perspektif pelbagai dimensi bagi jangka masa sederhana dan panjang. Strategi yang akan dilaksanakan termasuk menambah baik akses kepada perkhidmatan penting, meningkatkan pendapatan dan taraf hidup isi rumah miskin, menangani kemiskinan bandar, memperkuat mekanisme penyampaian perkhidmatan dan mengurangkan ketidaksetaraan antara isi rumah. Program pembasmian kemiskinan akan dilaksanakan melalui kerjasama lebih erat dalam kalangan agensi Kerajaan serta usahasama di antara sektor awam, sektor swasta, pertubuhan masyarakat sivil (CSO) dan masyarakat. Tumpuan khusus akan diberi kepada daerah dan lokasi yang termiskin di bandar dan luar bandar.

6. Secara khususnya, Kerajaan akan meneruskan dasar dan strategi untuk meningkatkan pendapatan dan kuasa beli serta kesejahteraan terutamanya isi rumah miskin dalam kalangan B40 antaranya:

- (i) Meningkatkan pendapatan isi rumah miskin;
- (ii) Penambahbaikan akses kepada perkhidmatan penting;
- (iii) Menangani peningkatan kos sara hidup dan meningkatkan kuasa beli; dan

(iv) Memperkukuh perlindungan sosial untuk semua.

7. Untuk memastikan bantuan sosial dapat disalurkan kepada kumpulan sasar yang tepat, program kebajikan sosial sedia ada bagi isi rumah miskin tegar dan miskin akan ditambah baik. Bantuan seperti pindahan tunai dan sokongan penjagaan kesihatan akan terus disedia berdasarkan keperluan. Program kebajikan produktif seperti keusahawanan dan pembiayaan mikro akan dipergiat untuk menyediakan peluang ekonomi kepada isi rumah miskin.

8. Sistem eKasih akan disemak semula dan diperkukuh dalam mengenal pasti, melaksana dan memantau program pembasmian kemiskinan bagi meningkatkan ketelusan dan ketepatan data. Dasar berasaskan bukti akan memudah cara proses mengenal pasti kumpulan sasar dan membangunkan profil isi rumah miskin. Pangkalan data berkaitan pembasmian kemiskinan dan bantuan sosial akan disepadukan melalui pembangunan Pangkalan Data Perlindungan Sosial (PDPS) untuk mengelakkan pertindihan serta ralat kemasukan dan penyisihan data. Analisis data raya dan dasar yang berpandukan data juga akan diguna untuk menambah baik program membasmi kemiskinan.

9. Selain daripada program sedia ada, pelaksanaan pendekatan bawah ke atas akan ditambah baik dengan melibatkan organisasi masyarakat sivil (CSO) dan organisasi berasaskan komuniti (CBO). Pihak berkuasa tempatan dan ketua komuniti juga akan diperkasa untuk mengenal pasti dan mengurangkan kelompok kemiskinan pada peringkat komuniti. Pegawai kerajaan yang khusus di peringkat tempatan akan ditugaskan untuk menyelaras dan melaksanakan pendekatan akar umbi bagi memastikan kejayaan inisiatif mengurangkan insiden kemiskinan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN MA'MUN BIN SULAIMAN
(KALABAKAN)**

TARIKH : 06 OKTOBER 2021 (RABU)

SOALAN

TUAN MA'MUN BIN SULAIMAN [KALABAKAN] minta **MENTERI KERJA RAYA** menyatakan kerangka pembangunan yang telah diperincikan oleh Kementerian bagi merealisasikan setiap satu fasa pembinaan Jalan Kalabakan-Serudung serta Kompleks Kastam Imigresen & Kuarantin (CIQ) Serudung, dan peranan yang dimandatkan kepada JKR Sabah bagi menjayakan kedua-dua projek tersebut.

JAWAPAN

Tuan Yang Di-Pertua,

Untuk makluman Ahli Yang Berhormat, Projek Lebuhraya Trans Borneo jajaran Kalabakan-Serudung telah diluluskan oleh Kementerian Kewangan di bawah Inisiatif Belanjawan 2020. Peruntukan sebanyak RM10 juta telah diluluskan di bawah inisiatif ini bagi melaksanakan kajian terlebih dahulu. Skop kerja yang terlibat ialah kerja ukur tanah, penyiasatan tanah, environmental screening, kajian impak trafik, dan kajian impak sosial serta keperluan penyediaan Kompleks Kastam Imigresen & Kuarantin (CIQ).

Walau bagaimanapun, pada Jun 2020 Kementerian Kewangan telah memutuskan untuk tidak meneruskan semua inisiatif Belanjawan 2020 yang telah diumumkan. Lanjutan daripada itu, kerja-kerja awalan ini tidak dapat diteruskan kerana tiada peruntukan disalurkan kepada Kementerian ini.

Kementerian ini akan meneliti cadangan projek ini sekiranya dimohon dalam Rolling Plan yang akan datang dan diangkat kepada Agensi Pusat untuk pertimbangan dan kelulusan.

Sekian, terima kasih.

**PEMBERITAHUAN PERTANYAAN
MESYUARAT PERTAMA, PENGGAL KEEMPAT,
PARLIMEN KEEMPAT BELAS,
DEWAN RAKYAT**

PERTANYAAN : LISAN

DARIPADA : TUAN AHMAD BIN HASSN [PAPAR]

TARIKH : 6 OKTOBER 2021 (RABU)

SOALAN

Minta **PERDANA MENTERI** menyatakan relevan portfolio Tugas-Tugas Khas di Jabatan Perdana Menteri dalam membantu kerajaan mengekang COVID-19 dan inisiatif-inisiatif yang telah digerakkan oleh portfolio tersebut dalam menjayakan ministerial agenda bagi Program Imunisasi Kebangsaan seperti Kementerian-Kementerian lain

JAWAPAN

**YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Untuk makluman YB, terdapat lima (5) agensi yang telah ditempatkan di bawah seliaan Menteri di JPM (Tugas-tugas Khas). Agensi-agensi tersebut adalah Majlis Pengurusan Bencana Negara (NADMA), Angkatan Pertahanan Awam (APM), TERAJU, SEPADU dan Yayasan Peneraju Pendidikan Bumiputera. Pada masa yang sama, Menteri di JPM (Tugas-Tugas Khas) juga akan menjalankan tugas yang diarahkan oleh YAB Perdana Menteri dari masa ke semasa.
2. Untuk makluman lanjut YB, Menteri di JPM (Tugas-Tugas Khas) telah membantu Kerajaan bagi mengekang wabak Covid-19 melalui

agensi NADMA dan juga APM. NADMA bertindak sebagai penyelaras bagi pengurusan bantuan bencana dalam memastikan bantuan tersebut dapat diuruskan dengan teratur dan efektif. NADMA juga menyelaras tindakan pengoperasian dan gerak kerja termasuk pengurusan logistik bagi Jawatankuasa Pengurusan Bencana Negeri (JPBN) dan Jawatankuasa Pengurusan Bencana Daerah (JPBD). NADMA juga bertanggungjawab dalam menguruskan bantuan kepada mangsa Covid-19, pengurusan stesen kuarantin serta menguruskan bantuan Tabung Covid-19 kepada mereka yang disahkan positif atau kontak rapat kepada pesakit.

3. Manakala APM pula adalah salah sebuah agensi keselamatan yang telah diberikan kuasa dalam pelaksanaan Akta 342 : Pencegahan Dan Pengawalan Penyakit Berjangkit 1988. APM adalah salah satu agensi yang menjadi tunjang utama sekretariat pengurusan bencana dalam menangani pandemik Covid-19. Antara tugas yang dipikul oleh APM dalam membantu untuk mengekang wabak Covid-19 adalah melalui rondaan bersama pihak berkuasa lain, penugasan pentadbiran, pengumpulan data, pengurusan penghantaran bekalan dan bantuan ke kawasan Perintah Kawalan Pergerakan Diperketatkan secara Pentadbiran.

4. Pada masa yang sama, APM juga berperanan dan penglibatan dalam merancang pembukaan, pengoperasian dan penutupan Stesen Kuarantin, memastikan Pelan Tindakan Kecemasan berjalan lancar, memastikan penghantaran makanan mengikut masa, menguruskan sisa klinikal, kerja-kerja sanitasi dan terminal cleaning diuruskan dengan baik.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 6 OKTOBER 2021 (RABU)

SOALAN

Minta **PERDANA MENTERI** menyatakan apakah iktibar daripada kegagalan Kerajaan menangani COVID-19 sehingga kes mencapai rekod tertinggi selepas PKP dan Darurat diisytiharkan dan bukan sebaliknya. Adakah Kerajaan bersedia untuk beralih daripada pembasmian kepada hidup bersama COVID-19 dengan membuka semula sektor ekonomi.

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Tujuan utama kerajaan melaksanakan PKP adalah sebagai langkah memperketatkan kawalan pergerakan awam bagi membendung penularan jangkitan COVID-19 di negara ini. Selain itu, pendekatan dan langkah-langkah tambahan wajar telah dilaksanakan bagi menampung kekangan yang ada di bawah Akta 342 dan akta-akta lain. Justeru, Proklamasi Darurat telah dilaksanakan sebagai langkah tambahan bagi mengekang penularan wabak COVID-19 yang menjadi ancaman terbesar terhadap pembangunan sosioekonomi negara.
2. Pelbagai inisiatif dan strategi ekonomi telah turut dilaksanakan oleh pihak Kerajaan sebagai persediaan rakyat untuk hidup dalam norma

baharu dan pada masa yang sama bagi mengimbangi kesan ke atas sektor-sektor ekonomi. Antaranya, pihak Kerajaan kini giat menggerakkan strategi negara untuk melangkah ke hadapan bersama norma baharu berdasarkan empat (4) elemen utama iaitu:

- (a) Melaksanakan Perintah Kawalan Pergerakan (PKP) sebagai usaha mengurangkan penularan wabak;
- (b) Memperkasa Program Imunisasi COVID-19 Kebangsaan (PICK) bagi membina ketahanan diri;
- (c) Memperkenalkan Pakej-pakej Bantuan dan Rangsangan Ekonomi untuk memastikan kehidupan rakyat terpelihara dan memulih semula ekonomi; dan
- (d) Memperkenalkan Pelan Pemulihan Negara atau PPN sebagai strategi peralihan keluar secara berfasa daripada krisis COVID-19.

3. Kerajaan pada Ogos 2021 juga telah mengumumkan kemudahan bagi pembukaan pelbagai sektor ekonomi bagi yang telah menerima vaksinasi lengkap di negeri-negeri Fasa 1, 2 dan 3 PPN berkuatkuasa 16 Ogos 2021. Pengoperasian aktiviti tidak perlu (*non-essential*) di dalam sektor-sektor berkenaan juga dibenarkan dan tertakluk kepada kadar vaksinasi lengkap yang telah ditetapkan.

4. Dalam hal ini, Agensi Pelaksanaan Ekonomi dan Koordinasi Strategik Nasional (LAKSANA) telah ditubuhkan di bawah Kementerian Kewangan sebagai pemudahcara dan pemantau rapi pelaksanaan inisiatif serta bantuan. Semua strategi dan langkah-langkah yang telah dirancang kini merupakan persediaan pihak Kerajaan untuk beralih daripada pembasmian kepada hidup bersama COVID-19 tidak lama lagi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN LIM GUAN ENG
[BAGAN]**

TARIKH : 06 OKTOBER 2021 (RABU)

SOALAN

Tuan Lim Guan Eng [Bagan] minta **Perdana Menteri** menyatakan kedudukan penguatkuasaan Ordinan Darurat khususnya implikasi kewangan ke atas perbelanjaan Kerajaan dan pembelian vaksin dengan menggunakan dana Kumpulan Wang Amanah Negara.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, semasa Proklamasi Darurat 2021 [*P.U.(A) 7/2021*] ("Proklamasi Darurat 2021") sedang berkuat kuasa mulai 11 Januari 2021 hingga 1 Ogos 2021, Yang di-Pertuan Agong ("YDPA") telah memasyhurkan tujuh (7) ordinan darurat selaras dengan Perkara 150(2B) Perlembagaan Persekutuan ("PP") seperti yang berikut:

- (a) Ordinan Darurat (Kuasa-Kuasa Perlu) 2021 [*P.U. (A) 12/2021*];
- (b) Ordinan Darurat (Pencegahan dan Pengawalan Penyakit Berjangkit) (Pindaan) 2021 [*P.U. (A) 76/2021*];
- (c) Ordinan Darurat (Standard Minimum Perumahan, Penginapan dan Kemudahan Pekerja) (Pindaan) 2021 [*P.U. (A) 77/2021*];
- (d) Ordinan Darurat (Kuasa-Kuasa Perlu) (No.2) 2021 [*P.U. (A) 110/2021*];
- (e) Ordinan Darurat (Kuasa-Kuasa Perlu) (Pindaan) 2021 [*P.U. (A) 151/2021*];
- (f) Ordinan Darurat (Kehadiran Wajib Pesalah-Pesalah) (Pindaan) 2021 [*P.U. (A) 173/2021*]; dan
- (g) **Ordinan Darurat (Kumpulan Wang Amanah Negara) (Pindaan) 2021 [*P.U. (A) 186/2021*].**

SOALAN NO : 55

Ordinan-ordinan Darurat di atas secara bersama dirujuk sebagai “Ordinan Darurat 2021”.

Ordinan Darurat 2021 berkuat kuasa sehingga dibatalkan, diumumkan atau terhenti berkuat kuasa mengikut kedudukan undang-undang seperti yang berikut:

- (a) dibatalkan oleh YDPA mengikut Perkara 150(3) PP semasa Proklamasi Darurat 2021 sedang berkuat kuasa;
- (b) diumumkan melalui suatu ketetapan yang diluluskan di hadapan kedua-dua Majlis Parlimen mengikut Perkara 150(3) PP; atau
- (c) terhenti berkuat kuasa mengikut Perkara 150(7) PP setelah habis tempoh enam (6) bulan Proklamasi Darurat 2021 terhenti berkuat kuasa iaitu mulai 2 Februari 2022,

mengikut mana-mana yang terdahulu.

YAB Perdana Menteri dalam kenyataan media bertarikh 3 Ogos 2021 memaklumkan proses pembatalan Ordinan Darurat 2021 oleh YDPA sepertimana yang disembah nasihat oleh Jemaah Menteri pada 23 Julai 2021 tidak dapat disempurnakan.

Sehubungan dengan itu, memandangkan Proklamasi Darurat 2021 [P.U. (A) 7/2021] (“Proklamasi Darurat 2021”) telah terhenti berkuat kuasa pada 2 Ogos 2021, maka YDPA tidak lagi diperuntukkan dengan kuasa untuk membatalkan Ordinan Darurat 2021 di bawah Perkara 150(3) PP.

Kaedah lain untuk membatalkan Ordinan Darurat 2021 adalah melalui proses pengungkapan di hadapan kedua-dua Majlis Parlimen mengikut Perkara 150(3) PP.

Bagi tujuan mengumumkan Ordinan Darurat 2021 oleh Majlis Parlimen mengikut Perkara 150(3) PP, **ketetapan untuk**

mengumumkan Ordinan Darurat 2021 hendaklah diluluskan oleh kedua-dua Majlis Parlimen.

Setakat Mesyuarat Khas Penggal Ketiga Parlimen Keempat Belas Majlis Mesyuarat Dewan Rakyat, diperhatikan **tiada apa-apa ketetapan berhubung dengan pengumuman mana-mana Ordinan Darurat 2021 telah diluluskan oleh Majlis Parlimen.**

Sehubungan dengan itu, Ordinan Darurat 2021 masih berkuat kuasa sehingga diumumkan melalui ketetapan yang diluluskan oleh kedua-dua Majlis Parlimen.

Melalui pewartaan Ordinan Darurat (Kumpulan Wang Amanah Negara) (Pindaan) 2021 pada 21 April 2021, Kerajaan telah dibenarkan menggunakan dana KWAN bagi tujuan pemerolehan vaksin dan perbelanjaan berkaitannya. Siling peruntukan yang telah diluluskan adalah berjumlah RM5 bilion menggunakan dana KWAN.

Dalam hal ini, memandangkan cadangan Kerajaan untuk mengungkap semua ordinan termasuk ordinan ini berkuatkuasa 21 Julai 2021 tidak dapat disempurnakan, perbelanjaan perolehan bekalan vaksin dan perbelanjaan Program Imunisasi COVID-19 Kebangsaan (PICK) masih diteruskan menggunakan dana KWAN sehingga kini. Setakat 22 September 2021, sejumlah RM3.2 bilion telah dibelanjakan untuk pembelian vaksin dan PICK menggunakan dana KWAN.

Sekian, terima kasih.